


B. VI. 23



E

L

R

A

cc

7



# HOLOCAUSTOMA MEDULLATUM

DEO in recognitionem supremi dominij  
juxta præscriptum Legis Evangelicæ

O B L A T U M

seu

## EXHORTATIONES AD NOVITIOS PROFESSANDOS

Operâ, & Studiô

RP. BONAVENTURÆ MERESS

S. Ordinis Monachorum S. Pauli  
primi Eremitæ Monasterij Novi-  
tiatûs S. Mariæ ad Brzozoviam

Supprioris, & Magistri No-  
vitiarum

C O N C I N N A T Æ

Annô quô pro peccatis hominum

DEUS oblatio factus est 1773.

~~~~~

Typis Clari Montis Czestochoviensis 1775.

Cum votum voveris Domino  
DEO tuo, non tardabis reddere,  
quia requiret illud Dominus DEUS  
tuus, & si moratus fueris reputabi-  
tur tibi in peccatum. *Deut. 23. cap.*  
*v. 21.*

Dic homo, quid speres, qui mun-  
do totus adhæres  
Tecum nulla feres, licet omnia  
solus haberes.

POETA SACRATIOR.

*M. P. Eremitarum samalduerz*

*F. Stanislaus.*

# PROTESTATIO

Authoris.

**U**Nius, Sanctæ, Romanæ, Catho-  
licæ, & Apostolicæ Ecclesiæ  
quemadmodum me filium indignum  
semper profiteor, & profiteri desi-  
dero; ita hancce meam opellam e-  
jus Judicio (quod humillimè adoro)  
substerno, & quidquid illa, in ea re-  
jiciendum putaverit, etiam ego re-  
jiciendum censeo, rejectumquè volo.

Fr. Bonaventura.



FACULTAS  
REVERENDISSIMI PATRIS GENE-  
RALIS PRÆLATI INFULATI.

**H**Olocaustoma Medullatum ope-  
râ Patris Bonaventuræ Merefs  
Ordinis nostri Sacerdotis conscriptū,  
& per deputatos à Nobis Viros The-  
ologos Virtute Doctrinaquē præclar-  
os revifum, ut omnino typis vulga-  
ri poffit ( quoad in nobis est ) in  
Nomine Domini facultatem imper-  
timur. In Monasterio Clari-Montis  
18. 7bris. 1774.

PAULUS Ords. Mon: S.  
PAULI primi Eremitæ  
PRIOR GENERALIS

*imp.*



# CENSURA THEOLOGORUM ORDINIS.

**H**olocauftoma Medullatū Deo inrecognitionē  
Supremi Domini juxta Præscriptū Legis E-  
vangelicæ oblatū, ſive Exhortationes ad Novi-  
tios Profeſſandos concinnatas, operâ R. P. Bo-  
naventuræ Mereſs S. Ords Monachorū S. Pauli  
primi Eremitæ Monasterij Novitiatūs ad Brzo-  
zoviā, Supprioris & Magiſtri Novitiorū, cū ni-  
hil contrariū Fidei imò omnia conſona ſenſui S.  
Eccleſiæ contineant, ad mandatū Rmi Patris Ge-  
neralis Ordinis Noſtri Prælati Inſulati perlectas  
approbo, ac prælo dignas cenſeo, ſalvo Jure e-  
orū. Quorū de Jure &c. Datto in Monasterio  
Clari Montis Częſtochoviensis die 3tia Septem-  
bris Annō D. 1774.

Pr. Nepomucenus Wiktor Ejusdē Ordinis  
S. T. D. & Vicarius Provinciæ mpp.

**H**olocauftoma ſeu Exhortationes ad Profeſſan-  
dos Oblationē Sui ipſius per Vota Supremo  
Numini ſugamquē Sæcularis vitæ perſuadentea.  
per R. P. Bonaventurā Mereſs Monasterij S.  
Mariæ ad Brzozoviam Suppriorē ac Magiſtrū  
Novitiorū factæ, ac per me ad mandatū Rmi  
Patris Generalis Prælati Inſulati lectæ appro-  
bantur Annō Domini 1774. die 3. 7bris.

Er. Juſtus Rendak Ords Monachorū  
S. Pauli primi Eremitæ SS. Th. Dr.  
Pr. Provinciæ. mpp.

AP.

## APPROBATIO CENSORIS ORDINARIJ

**Q**uanta animi voluptate Exhortationes  
XXXIII. pro Sacris Professionibus per  
A. R. P. Bonaventuram Mereſs S. Ordinis Mo-  
nachorum S. Pauli primi Eremitæ Monasterij,  
Pinczoviensis Suppriorum & Magistrum Novi-  
tiorum elucubratis, jamque luci publicæ dona-  
tas nuper evolveram, non minori ſpiritus ju-  
cunditate, alias XXI. Exhortationes, tum Ser-  
mones pro ſingulis Anni Feriis ſextis Themati  
Dominicæ ſubſequentis accomodatos, & in gra-  
tiam eorundem Sacræ Religionis Candidatorum  
conſcriptos, rursus perlegi, nihilquè in eis quod  
aut Sacroſanctæ Fidei Catholicæ Romanæ do-  
gmatibus, aut bonis moribus adverſetur reperi.  
Omnia antiquum Monasticum ſpiritum, & ex-  
altiore Regularis diſciplinæ obſervantiam inſi-  
nuant, & ad perfectiorem vitæ ſtatum ſuaviter  
impellunt. Opus & Authore ſuo, & luce publicæ  
dignum cenſeo. Dabam in Collegio Majori U-  
niverſitatis Cracoviensis, Kalendis Februarii.  
Annò Dni. 1775.

M. JOSEPHUS PUTANOWICZ Sæ.  
Th. Dr. & Pfr. Eccl. Cath. Plocen.  
Can. Coll. SS. OO. Prepoſitus Paroch.  
Opatovecen. Curatus Librorum per  
Diaceſim Cracovien. Cenſor mpp.  
Ad

# Ad Candidum Lectorem.

**N**Orim perbelle Candide Lector! Te  
haud latere, otium, pulvinar fore  
principis tenebrarum laci inferioris,  
tempestatemquè, iuxta S. Cyrill. Apo-  
log. mor. apud Corderium ex anti-  
quo M. S. Codice, cordis Quod  
ipsum non modò animum titillavit, sed  
& calamum excitavit, ut præsentis  
Opellæ pagellas exararem, tuequè  
commoditati studens, aprico consigna-  
rem paulò breviores nupernis.

Vellem ego, ut quantumvis labor  
hic non nihil macilentus sit, in quovis  
tamen pinguesceret: illud in singulis  
adimplere delictum habens, quod suis  
Incarnata illa Sapientia identidem re-  
commendavit, dicens: Estote & vos  
perfecti, sicut & Pater vester Cæle-  
stis perfectus est. Matth. c 5. v. 48.

Nego-




Negotium dictum ita mentem, & pennam possedit; equidem omni nisu in id unum feror, ut semita illa, que ad perfectionem ducit, toti palam fiat mundo, atque mundus universus, Religiones singule per suos Alumnos cœ-ium fiant, ut gradientur inoffenso, quo cunctos properare iri necessum, pede.

Volve igitur, & revolve has pro sacris Professionibus Exhortationulas, & ut Te ad vitæ eterne viam dirigant, candido pectore exoptat, qui scribit.

Fr. Bonaventura.

EXHOR.



EXHORTATIO I. ad unum.

*Vanitas vanitatum omnia.* Eccles.  
cap. I. v. 2.

I.



Spectamus mortales omnia, quæcunque nobis sol iste utpote lucidissimus planetarū princeps monstrat, quæcunque oculus noster propriâ cernit, vel cernere potest pupillâ, quæcunque audit, vel audire potest auris nostra, en habemus omnium horum taxam nobis

A per

per os Sapiientis promulgatam: *Vanitas vanitatum omnia.* Et rectè:

2. Verè enimverò vanitas quid. quid in hoc sæculo humana mortalitas appetere potest. Nonnè ipse mundus præfert speciem vanitatis? in quo tametsi mundo, non attamen mundo, omnia immundo. Quid namq; ille est, nisi fons mali, omni scelere fecundus, in quo nîl sanæ remonstratur mentis fraudibus pleno, pleno detrimentis?

3. Dan. cap. 2. v. 31 & sequ. Grandis quondam Regi Babylonæ ostensa fuit statua, sublimis in altum, caput ejus purum, & generosum aurum, pectus, & brachia de argento, venter, & femora ex ære, tibiæ ferreæ, pedes partim ferrei, partim fictiles. Hanc statuam excelsam, dum modicissimus de monte abscissus percussit.



cussit lapillus, totam in cineres rede-  
git. Hinc videamus quàm parvo ictu  
corruit hæc grandis statua, & quem-  
admodum hoc in ictu oculi factum  
fuit: sic momentò omnes in mundo  
evanescunt voluptates, corruunt ho-  
norum dignitates. Ut aquæ bulla fá-  
cile per levem dissipatur ventum, ut  
fulguris coruscantis brevi lux extin-  
guitur; ita in hoc mundo omnia de-  
lectabilia non diu durare iri necessum.

4. Referunt Authores, quòd  
terra illa, in qua DEUS Sodomam,  
Gomorham, & alias civitates sulfu-  
reo igne combussit, soleat proferre  
arbores, quæ generant fructus exter-  
na specie svaves, visu pulcherrimos,  
sed si manu tangantur, tetro odore  
adstantium inficiunt nares, & in fa-  
villam, ac cineres rediguntur. Ecce  
vera imago mundanæ vanitatis, di-

gnitatis, honorum, opum temporali-  
um, quæ exterius visa nescio quid  
habeant fictæ gloriæ, & fallacis splen-  
doris, qui oculos mortalium capit,  
& introrsus inspecta, gravissimum  
multorum peccatorum exhalant fæ-  
torem, in quem miseri horum ama-  
tores impingunt, & dum brevi de-  
cursu temporis finiuntur, in favillam,  
& cineres convertuntur. Et, ut pau-  
cis complectamur totum, omnia ista  
vilibilia mundi bona habent se ad in-  
star ciborum exquisitissimorum in ta-  
bula depictorum, qui & si oculos in-  
tuentium summè delectent, minimè  
tamen satiant ventrem esurientem.  
Meritò ergo omnia hæc temporalia  
bona, omnis hæc mundana prosperi-  
tas tamquam vera, & ipsissima vani-  
tas postponenda est, & contemnenda.  
Quod ipsum est, quod intimè svadet

S. Cy-

3  
S. Cyrillus Jerosolymitanus dum ita  
Catech 1. fatur: *Mundana hæc omnia  
postpone: parva enim sunt, quæ relin-  
quis: maxima verò, quæ dantur à Do-  
mino.*

5. Quò circa restat Dilectissime  
in Christo Frater Professande, ut  
contempta sæculi vanitate aliò velis,  
remisquè, ut ajunt, contendas, ubi  
duntaxat vera bona invenias, illaquè  
nuspiam peritura; & hæc sunt illa,  
quæ spiritualia nuncupantur. Velit  
te absorbere mundus; tu absorbe illū  
cum omnibus pompis ejus, & trajice  
in corpus tuum per sacram Professio-  
nem; macia, & manduca, quò pa-  
bulò vitâ tuâ nutritus haud esuries  
in perpetuas æternitates. Quod, ut  
eveniat, cordicitùs exopto.

Modò autem quæro ex te semel,  
bis, ter canocicè utrum ex animo de-  
voto



voto, & spe perseverantiæ, optata-  
quæ salutis affectu, petas ipsam Pro-  
fessionem! Const. p. I. c. 8. n. I.

## EXHORTATIO II. ad unum.

*Si vis perfectus esse -- sequere me.*

Matth. 19. 21.

**Q**uia sacrum habitū suscepimus;  
quia mores sæculares exui-  
mus, quia mundani fermè esse desy-  
mus, non videtur necessaria illa dili-  
gentia, ut ad vitam spiritualem mo-  
nitionibus quibusdam provocemur,  
animemur, stimulemur: nihilominus  
Salvator Christus continuo inquit:  
*Si vis perfectus esse sequere me* Pro-  
fectò multa adhuc egemus persvasi-  
one ad arctam viam salutis ample-  
ctendam, ad debitam perveniendi  
perfectionem, quæ nos hortetur de-  
fides

fides, impellat ignavos, excitet dormientes, & ad veram vitæ religiosæ alliciat perfectionem.

2. 4 Reg 25. Rex Joachin ductus in servitutem babylonicam diu in ea magnis opprimebatur angustijs, postquam verò beneficiô Regis Babylonæ eductus esset de carcere, in quo diu jacuerat vinctus, statim sedit in throno Satraparum Babylonæ; vestem sordidam commutavit pro regio, ac splendido ornatu, opiparisquè cibis quotidie vescebatur. Unde hæc tanta commutatio post tam miseram vitam; post squalidos carceres; post mortales anxietates! Respondet D. Greg. dicens: *Æquum erat, ut qui statum captivi deseruit, & amplitudinem amicitie tanti Regis obtinuit, iam nesciret angustias carceris. sed amabilis libertatis lætitiâ, & magna-*

*rum opum possessione gauderet.*

3 Hæc eadem nos ad perfectionis amorem, & sequelam promovere debent. Nequè enim minora sunt, sed longè majora, quæ à DEO accepimus, quàm quæ Rex Joachin à Rege Babylonix Joachin enim in barbari Regis amicitiam est admisus; Religiosus verò in veri Regis regum DEI familiaritatem est evectus. Ille liberatus è carcere tenebroso, Religiosus ereptus è sæculo procelloso. *Hoc sæculum*, inquit S. August. in Psal. 39. *mare est: habet amaritudinem noxiam, habet fluctus tribulationum, tempestates tentationum. Habet homines velut pisces de suo malo gaudentes & tamquam se invicem devorantes* S. verò Ambrosius in Psal. 118 Oëton 3 *Concupivit animal mea.* ita fatiur: *Vincula complu-*



*plura sunt in hoc sæculo. Vincula sunt desideria vivendi, vincula sunt oblectamenta voluptatum, vincula sunt honorum, vincula coniugij.*

4. Elevatus est, inquam, Joachin super Principes Babylonis; Religiosus verò associatus est Angelicis choris. Ille honore affectus est Principe secum benignè loquente; Religiosus summam gloriam adeptus est Christo secum quotidie verba miscente. Joachin abiecit vestimenta captivi, & indutus est veste regali; Religiosus deposuit veterem vitam, & vitæ Christi simillimam assumpsit.

5. Quòd si Joachin illa umbratica prosperitate delectatus amplius angustiarum carceris, & ærumnarum haud reminiscatur, quid, quælo, facere debet Religiosus? an cupiet iterum fædas sæculi voluptates? an vanas,

nas, & incertas mundi desiderabilia  
delicias? an abrumpere conabitur li-  
bertatem obedientis animi? an ex-  
petet studium orationis, suaves ge-  
mitus, dulcia suspiria, & omnium  
religiosarum virtutum cumulum cum  
sæcularibus curis commutare? Haud-  
quaquam. Imò tantam sui status di-  
gnitatem mente, & corde revolvens,  
ut eò securius vocantem sequatur  
Christam, vitam spiritualem, vitam  
vitæ simillimam Angelicæ aucupa-  
bitur, & totis viribus conabitur per-  
fectionis conscendere gradus.

6. Ad quem finem cum Reli-  
giosa Professio prodromum agat,  
ito jam Dilectissime in Christo Fra-  
ter Professande felici, quò cæpisti  
passu, & felix jam extitisti æternum.

Modò autem quæro ex te &c.  
vid. fol. 5.

## EXHORTATIO III. ad plures.

*Appropinquat redemptio vestra.*

Luc. 21. 28.

I. **N**unc apparet Dilectissimi in Christo Fratres Professandi quid intentatis; quid voluistis; quò tendere præmeditati fuistis, dum sacra Ordinis Eremitici Divinissimi Pauli primi Eremitæ Claustrorum limina ingressi fuistis. Quæsiuistis video sub victrici semper paulino palmeto; sub tam tutissimo ab omni incurso mundanarum navigationum assyllo vestræ salutis securitatem; vestræ vocationis felicem terminum. Dedistis ad id manus vestras militiæ sacre sub vexillo palmario D. Pauli Patris nostri; portastis pondus diei, & æstus; sustinuistis quæque vobis adversa; nunc felici temporum cursu

su venit vestræ militiæ, vestrorum laborum, vestræ patientiæ terminus; venit optata emittendæ Professionis sacræ dies, venit initiata salutis æternæ hora: Ecce *appropinquat redemptio vestra.*

2 Sed nolite triumphare. Attendite quid dicit Scriptura. Non dicit: *appropinquavit*, sed *appropinquat redemptio vestra.* Nunc vobis major aperitur campus, nunc ad majora vos debetis resolvere certamina; nunc primum certandum vobis erit in campo Religiosæ perfectionis, in quo post emissam Professionem, stantes videbitis contra vos hostes strenuè à vobis debelandos, si ad veram vultis pervenire victoriam; si seriò vestram velitis curare salutem. Equidem *In via vitæ non progredi,*  
regre-



*regredi est* teste Bernardo serm. 2. in  
Purif. B. V.

3. Pugnandum, iuquam, vobis  
erit cum itygio hoste, & in bono  
magis, magisque progrediondum.  
Pugnandum vobis erit contra prin-  
cipem nequitiarum superbiam, quæ  
licet de sublimi loco orta sit, quia ta-  
men à patre tenebrarum nata, sem-  
per super astra solium exaltare con-  
tendit. Pugnandum vobis erit con-  
tra omnem ambitionis fastum; cer-  
tandum contra acediam, nè hos fru-  
ctus pietatis, devotionis, orationis,  
quos per annum vestræ collegistis  
probationis, stertendo, jacendo, per  
angulos discurrendo amittatis. *Iu-  
storum semita quasi lux splendens pro-  
cedit, & crescit, usque in perfectam  
diem.* Prov. 4. 18.

4. Curandum vobis erit, ut  
super.

superbiam vincatis humilitate; ambitionem, vanæ gloriæ contemptu; flore castitatis, luxuriæ sordes minueritis everrere; iræ ignem, iracundiæquè incendium, manivetudine extinguere; gulam, abstinentiâ domare; invidiam, charitate proscribere; acediam fervore devotionis eliminare.

5. Ad tale ergo certamen parati esse debetis, si vultis, ut appropinquans vobis regnum DEI, pro corona laborum vestrorum olim recipiatis.

Modò autem quæro ex vobis  
&c. vid. fol. 5.

#### EXHORTATIO IV ad plures.

*Ecce nos reliquimus omnia. Matth.*

19. 27.

1. **I**sta est gloriosa, sancta, ac beata

ta vita, contemptus mundi, vanitatumquè ejus, & sequela Christi. *Et secuti sumus te.* In derelictione omnium, & sequela Christi, omnium si populorum, à potiori, ac fortiori Religiosorum omnis perfectio, & salus æterna est firmata.

2. Ast quis ille est; quis eò pervenit, ut plenè omnia derelinquat, & ferventi spiritu, sincero affectu, zelo inextinguibili, generosò, voluntate perfecta Christum sequatur? Si quispiam talis invenitur, vos ego Dilectissimi in Christo Fratres Profefandi agnosco.

3. Vos etenim amore Christi culmen hoc perfectionis Evangelicæ, consequenter Religiosæ assequi intenditis, qui ita cuncta, quæ vobis DEUS, fortuna, domus, & industria

stria concessit, deseritis, ut nihil vobis relinquatis.

4. Parum est hoc, sed etiam, ut Christum sequamini, ut ipsum in vita, & moribus vestris repræsentare possitis, adeò vos ab omnibus abstraxistis, quòd, quæ terræ sunt, abnegetis; quæ mundi sunt, haud appetatis; quæ vestri-ipsorum, reiciatis, ut in terra, extra terram; in mundo, extra mundum; in vobisipsis, extra vosipsos vivatis.

5. Terræ contemptores generosi mundi conculcatores magnifici, vestriipsorum victores gloriosi! nunc verè dicere potestis DEO cum Regio. Propheta: *Quid à te volui super terram*, Psal 72 25 qui vestram conversationem non amplius cum hominibus, sed cum Angelis; non cum terrestribus, sed cum cælestibus quaeritis.

6. Ab



6. Ab hinc mundo vultis esse mortui pompas ejus, & dignitates aspernando per religiosam humilitatem; persecutiones ejus superando per patientiam; opes, & divitias rejiciendo per amplexum Evangelicæ paupertatis; propriam voluntatem abnegando per obedientiam; delicias proscribendo per mortificationem; carnem mortificando per jejunia, & vigiliis; delicias, inquam, proscribendo per subtractionem carni, quæ carnis sunt; voluptates proterendo per castitatem,

7. Fugitis, video, hinc; ubi nihil est, ubi inane est omne, quod magnificum esse putatur; ubi & qui se putat quid esse, nihil est; & omnino non est Ambrosio l. de fuga sæculi c. 5. teste.

8. Relinquitis umbram, & quæ-

B

ritis

ritis solem, deferitis fumum, & sequimini lumen: fumus iniquitas est; quia sicut fumus oculis, sic iniquitas, utentibus eâ eodem ibidem affirmante. Umbra est vita præsens, quam affertis illi, qui illuminat omnem hominem ad se venientem. Et hinc rectè de vobis dicere possum: *Relinquitis omnia*

9. Ut ergo vos S. Patriarcha noster D. Paulus primus Eremita non degeneres experiatur filios; ut vos sacra Mater Religio fœdisfragos non videat; ut quod votis promittitis re, & exemplo proferatis, huic vos studere oportebit profectui, ut post derelictionem mundi, post abnegationem vestriipsorum, per præsentem sacram Professionem, ad illum valeatis pertingere terminum, ad quem vos divina Sancti Spiritus  
in spi.

inspiratio vocavit. Quod, ut eveniat, animitus opto.

Modò autem quæro ex vobis  
vid. fol. 5.

## EXHORTATIO V. ad plures.

*Assumam vos mihi in populum, & ero vester DEUS. Exod. 6. 7.*

1. **Q**uantis malorum cumulis, quibus calamitatibus, & ærumnis, qualibus procellis, & periculis mundus iste refertus existat; nemo est, qui non videat, si tantùm paulò diligentius considerare velit.

2. Verè enimverò mundus hic non est aliud, nisi urbs iniquitatis, in qua regnat invidia, sævit crudelitas, dominatur ambitio, imperat libido, & vitia universa inveniunt requiem.

3. Mundus hic in maligno positus est, plenus laqueis; plenus scandalis & peccatis; circumseptus periculis, pravis colloquijs, iniquis consilijs, exemplis pessimis, & mortibus animæ infinitis Petro Blesensi ep. 142 teste.

4. Quare salutariter Hironymus ep. 1. ad Heliodorum: *Nolite, inquit, credere, nolite esse securi: licet in medium stagni iussum equor arri-deat; licet vix summa iacentis elemen-ti spiritu terga crispentur: magros hic campus montes habet; intus inclusum est periculum, intus est hostis. Expe-dite rudentes, vela suspendite. Crux antennæ figatur in frontibus: tran-quillitas ista tempestas est*

5. Res ipsæ finguis diebus, tubâ quâvis clarius declamant; quàm sint omnia hujus mundi vilia, quàm  
ridi-



II  
ridicula, quàm turpia, quàm periculosa, quàm profundi barathri, si Chrysostomo serm 14. in c. 8. ad Romanos fidem damus.

6. Nunc ergo quæramus, & interrogemus nosmetipsos, quæ illa fuit causa, ob quam nos misericordissimus DEUS è tantis calamitatibus, è tantis malis eduxit mundi, & exemit, dum inquit: *Assumam vos, & ero vester.* Quare nos in domum suam, in amænissimum paradisum, in locum quietis, & pacis scilicet in Statum Religiosum vocavit? Quare in tam amplissimam dignitatem elevavit; nam *servire DEO, regnare est* juxta Bernardi effatum? Quare tantis cumulavit beneficiis, & à fluctibus sævi maris eductos in portu tantæ tranquillitatis locavit?

7. Certè non ideo, ut otiò, & socordiâ torpeamus; ut in vanis occupationibus tempus infumamus; ut vitam commodis plenam, & rebûs ad usum necessarijs abundè refer-tam habeamus; ast hæc unica causa, ut tantis impensîs spiritualibûs nobis exhibitis, non temporalem, sed æternam nostram procuraret salutem.

8. Hic finis est beneficiorum ejus, ut à sæculi vanitate eruti, certociùs æternam salutem consequamur ad Religionem vocati, in qua ei soli famulantes ipsum recognoscamus DEUM nostrum: *Assu-mam vos mihi in populum, & ero ve-ster DEUS.* Ut illum semper cogitemus; ejus consortia nobis dulcia, nobis svavia cupiamus, & in cunctis nostris actibus in cunctis operibus, solis divinis inhærentes, ipsius ho-

norem, ipsius gloriam affectemus.

9. Omnino hi tantum Religiosi habent DEUM pro DEO, qui divitias flocci pendunt, voluptates abhorrent, honores, & mundanas dignitates non curant; sed DEUM solum, qui eos de sæculo nequam tamquam de servitute babylonica eripuit, toto, & sincero corde quaerunt; virtutes sectantur, Religiosamquæ totis viribus desiderant perfectionem.

10. Illos vere sibi assumit DEUS: *Assumam vos mihi*, qui mentis, & cordis puritatem sectantur; qui ita in divinum obsequium fervore, & animi contentione currunt, quemadmodum ipse DEUS in ipsorum præsidium, juvamenquæ festinat; qui ita illum fidelitate, & mandatorum observantiâ complectuntur,

tur, sicut sentiunt se ab ipsius maiestate, & potentia contineri; qui divinis inspirationibus, & sanctis desiderijs se repleri sinunt.

II. Illi verè habent DEUM pro DEO, qui suam abnegant voluntatem; qui nihil præter illum cupientes, & nullam rem creatam amantes, in ipso solo omnes affectus, & omnia sua desideria locant; qui sancti esse conantur, sicut & ipse sanctus est; qui in mentibus proprijs similitudinem exprimunt divinam.

12. Hæc ergo est idea illorum vitæ, quos DEUS sibi assumpsit, quam si tenueritis Dilectissimi in Christo Professandi, illò pertingetis indubiè, ubi de vestra sancta vocatione exultabitis cum populo DEI æviterne.

Modò autem quæro ex vobis  
 &c. vid. fol. 5. EX-



## EXHORTATIO VI. ad unum.

*Vocem meam audi. Psal 118 149.*

1. **C**erta spes æternæ salutis consequendæ, si quis Statum Religiosum amplexus fuerit, & in eo vixerit juxta Regulas u. quæ ad mortem. Hoc enim promittit infallibilis veritas ipse DEUS suis Apostolis, qui verè erant Religiosi, ac omnibus alijs id vitæ genus profitentibus Matth. 19. 29. dicens: *Omnis, qui reliquerit domum, vel fratres, aut sorores, aut patrem, aut matrem, aut uxorem, aut filios, aut agros, propter nomen meum, centuplum accipiet, & vitam æternam possidebit.*

2. Supra quæ verba scribens Chrysostomus ait: *Impossibile est mentiri DEUM. Promisit ille vitam æternam relinquentibus omnia, ergo,*

*& tu*

¶ *tu Religiose, qui hæc abieciſti, quid prohibet te. ac huiusmodi conſidere promiſſione ¶ eſſe ſecurum.*

3. *Felix proin paupertas, inquit Bernardus, voluntariæ omnia relinquentium, ¶ ſequentium DEUM. Felix planè, quæ tam ſecuros, ¶ tam glorioſos facit in illo ſingulari fragore elementorum, ſcilicet die iudicij, in illo examine meritorum, in illo tanto discrimine iudiciorum*

4. Quocirca benè ſcripſit primus Patriarcha Venetarum S. Laur. Juſt. differens de diſciplina, & perfectione monaſtiæ converſationis: *Illius cæleſtis Civitatis iſte eſt introitus: Status ſcilicet Religioſus. Religio etenim talis locus eſt, de quo ait S. Jacobus Gen. 28 17 Verè non eſt hic aliud niſi domus DEI, & porta cæli. Qui hic viriliter certaverit,*

verit, & perseveranter, coronabitur  
 gloriosè illic. Duo sunt castra DEI:  
 celum, & Religio. Ambo sedes sa-  
 pientiæ, ambo sanctorum civitates.  
 Qui in hac laudabiliter conversatus  
 fuerit, ab illa excludi non poterit.  
 Securè speret post hanc peregrina-  
 tionem, ad illam supernam intrare  
 Hierusalem, quicumquè in justorum,  
 hoc est Religiosorum vocatus fue-  
 rit congregationem. Magnum quip-  
 pe electionis, hoc est prædestinati-  
 onis ad gloriam, indicium est, Re-  
 ligiosæ fraternitatis habere confor-  
 tium.

5. Inspiratio, quâ quis interiùs  
 sentit se ad Statum Religiosum am-  
 plectendum vocari, nullô modò po-  
 test esse ab alio, quàm à DEO.  
 Nam omnium cogitationum nostra-  
 rum tria sunt principia, seu origines:

DE-

DEUS videlicet, diabolus, & natura. Desiderium autem intrandi Religionem non potest inniti à natura; quia hæc abhorret ab illis rebus, quæ necessario sunt tolerandæ, & faciendæ in Statu Religioso, uti sunt mortificationes carnis, fuga peccatorum, abnegatio propriæ voluntatis, subiectio perpetua sub obedientiæ clausura, libertatis abdicatio, victus austerior, castitas perpetua, paupertas ardua.

6. Non potest quoquè inniti à dæmone; tum quia ille his omnibus contrariatur, tum quia ille non impellit ad statum virtutum, quod ei displicet, imò retrahit; tum quia videt animas sibi eripi per Statum Religiosum, quas in sæculo citius catenis peccatorum possideret.

7. Er-

7. Ergo necessario tale desiderium, intrandi Religionem, procedit à DEO, ut solus dicit: *Vocem meam audi.* Quis etenim magis desiderat salutem animarum nostrarum, quàm ipse DEUS, ut benè ait S. Bernardus serm. de S. Spiritu. *Quoties super castigando corpore, humiliando corda servanda unitate, charitate proximis exhibenda, virtutibus aquirendis, innocentia conservanda, pietate, devotione, & alijs sanctis operibus amplificandis, salubris cogitatio in mente versatur, divinus sine dubio spiritus est, qui loquitur.*


8. Quod ipsum confirmat D. Greg. libr. Dial. cap 158 dum inquit: *Per iugum divine obedientie reperit anima fidelis cum lumine fidei locum sancte Religionis, que procul dubiò fundata est à Spiritu Sancto,*  
*possi-*



*posita veluti secunda nāvicula pro recipiendis animabus, ut eas securè perducatur ad portum æternæ salutis*

9. Traxit te Dilectissime in Christo Frater Professande DEUS ad hanc sacram Religionem, & defactò trahit per emittendam Professionem, ut illi soli famuleris, fugias peccata, evadas pericula salutis & ut maiorem tibi in cælo præpares coronam post tuum laborem, post tuas orationes, post tuum cum carne, mundo, & diabolo certamen. Audi benignè, & suaviter vocantem, & pervenies, ubi finè fine gaudebis.

Modò autem quæro ex te &c.  
vid. fol. 5.



31

EXHORTATIO VII. ad plures.

*Fratres perfecti estote. 2. Cor. 13. 11.*

1 **A** Quo tempore Fratres in Christo Dilectissimi nomen sacræ dedistis Religioni, ex quo spiritualem amplexi estis statum, semper vos perfectos esse debere necesse est. Sed benè scitote, hanc vitæ spiritualis perfectionem simplicem non esse.

2. Una enimverò perfectio est justorum cum DEO jam regnantium in cælis, quâ fruuntur DEUM facie, ad faciem videntes, absquè ullo timore amissionis, altera est in hac vita mortali, in qua contemplamur per speculum, & in ænigmatibus. 1. Cor 13. 12.

3. Illi absquè ullo gemitu gaudent

dent de sua perfectione; nos in hoc statu licet primitias spiritûs habeamus, tamen intra nosmetipsos geminus adoptionem filiorum DEI expectantes.

4 Illi licet omnium minimi sint juxta statum meritorum suorum, nulla tamen aut peccati, aut defectus alienius levissimi sorde fœdati juxta illud Scripturæ Apocal. 21 27. *Non intrabit in illam Civitatem aliquod coinquinatum aut abominationem faciens*; nos verò licet purissimi nobis videamur, antiquâ tamen leviorum peccatorum maculâ inficimur juxta illud Prov 30 12. *Generatio, quæ sibi munda videtur, non est tamen lota à sordibus*

5. Illi tamquam victores coronis redimiti, timorem, ac metum procul abjiciunt, laborem amoveant,  
& ope-

& operum suorum fructibus gaudent; nos tamquam in conflictu belli positi semper habemus, quod timeamus, quod fugiamus, quod praeliando, & laborando prosternamus.

6. Si ergo Dilectissimi in Christo Fratres Professandi ad illam caelestem perfectionem serio aspiratis, etiam hanc in vestra mortali vita, in hoc mundanarum impietatum conflictu, minimè negligere debetis.

7. Audite, obsecro, DEUM, quomodo omnes homines per Ministrum suum D. Paulum Apostolum ad hanc invitat perfectionem I. Cor. I. 10. dicens: *Obsecro vos omnes, ut sitis perfecti.*

8. Si eadem perfectio (sensus est D. Chrysostomi supra hæc verba scribentis) omnibus hominibus proposita est, omnibus imperata, li-

C

qui-

quidò constat, omnibus eam possibilem fore.

9. Si autem omnibus fidelibus perfectio vitæ Christianæ possibilis est, quantò magis Religiosis pervia erit, & facilis, qui mundum peccandi materiam abundè subministrantem effugerunt, parentes, charos, fratres, sorores, consanguineos, notos, amicos dereliquerunt; hostes domesticos evaserunt; opes, delicias, & proprias voluntates abiecerunt?

10. Si sæculares mille obstaculis impediti currere ad hunc supernæ vocationis terminum facile possunt, quam ratione Religiosi liberi, & expediti ab omnibus, non valeant? si struthiones in cælum volare valent, quidni ipsæ aquilæ possint?

11. Si hæc via tam recta est, ut  
stul-



Stulti, modò velint, non errent per  
eam, quomodò Religiosi prudentio-  
ris ingenij existentes, finem vitæ be-  
atæ seriò cupientes, errabunt?

12. Equidem si tanta est perfe-  
ctionis lux, ut cæci eam videant; ut  
claudi eam teneant: si tanta suavitas,  
ut ægroti eam libenter gustent, & e-  
jus dulcedine capiantur, non puto,  
quin Religiosi impediri possint, ut  
hanc stellam splendidissimam non  
videant, gemmam pretiosissimam  
non possideant? Status enim Religi-  
osus secundum effatum D. Thomæ  
Aquinatis, status perfectionis est, &  
hominum ad perfectionem tenden-  
tium.

13. Quare quemadmodum Do-  
minus Isràëlitis de Ægypto in terram  
promissionis pergentibus omnia ad  
iter necessaria, cibos de cælo dela-

p'os, vestes, vires ad ambulandum, Luces qui ducerent, Imperatorem, qui numerosissimum populum gubernaret, & alia, quæ desiderare possent, abundè suppeditavit; ita Religiosis omnia affatim præbet temporalia, & spiritualia adjumenta, ut eorum præfidiô, & vitæ sæcularis abjectione, ad terram excellentiam lacte, & melle fluentem, hoc est, ad perfectionem Religiosam perveniant.

14. *Apprehendite ergo Dilectissimi in Christo Fratres disciplinam hanc tam salutarem, nè quando irascatur Dominus, & pereatis de via iusta; Psal. 2. 12. sed potiùs hac viâ gradientes ad cælestem Ierusalem pertingatis, & unusquisquè vestrum lætus excipiat, quod Dominus dicit Matth. 25. 21. Euge serve bone, & fidelis, quia super pauca fuisti fidelis, super*

*super multa te constituam intra in-  
gaudium Domini tui. Quod, ut e-  
veniat, corde exopto.*

*Modò autem quæro ex vobis  
vid. fol. 5.*

### EXHORTATIO VIII. ad unum.

*Si quis vult post me venire, abne-  
get semetipsum, & tollat crucem  
suam quotidie, & sequatur me.*

*Luc. 9. 23.*

1. **C**um Status Religiosus sit talis,  
in quo Christo invitante, eum  
sequuntur illi, qui mundum relin-  
quunt, & sequi debent, quemadmo-  
dum cuilibet D. Ambrosius Religi-  
olo instillat, dum ait: *Christus est  
finis omnium, quæ pia mente poscimus,  
in omnibus tibi sequendus est. Ad  
quem enim tendas, nisi ad omnem per-  
fectio-*

*fectionem, summamquè virtutum, & ideo tibi dicit: Veni sequere me. Hoc est, ut ad consumationem virtutum pervenire merearis Ergo qui sequitur Christum, eum pro possibilitate sua debet imitari.*

2. Hinc est, quàm malè pluri-  
mi agunt, quàm imprudenter faci-  
unt, qui aspirantes ad Religionem,  
magnos sibi in ea promittunt hono-  
res, singulares respectus, res speci-  
osas, & omnia proprio grata amorì,  
cùm evidenter pateat, quòd non ad  
delicias, non ad honores, non ad  
voluptates D E U S nos vocet ad  
Religionem, sed ad sui, abnegatio-  
nem, ad tolendam crucem, ad imi-  
tandum eum: *Si quis vult post me  
venire abneget semetipsum, & tollat  
crucem suam quotidie, & sequatur  
me.*

3. In quibus verbis, considera Dilectissime in Christo Frater Professande qualem Dominus omnibus Religiosis consequenter & tibi, qui ad sacram properas Professionē, dat doctrinam. Ecce tibi tres proponit gradus perfectionis, in quibus cum omnino imitari debebis, nempe tui abnegationem, crucis bajulationem, & virtutum suarum imitationem, ut per illos facilius conscendas Religiosæ perfectionis cacumen.

4. Abnegatio sui, consistit in abnegatione propriæ voluntatis, proprii judicii; proprii consilij, quæ, si quis cum corporis, ac omnium viti-  
orum sentina non fugerit, non ex-  
erit; virtutes, ac pietatem sectatus non fuerit, frustra mundum dese-  
ruit, frustra bona temporalia con-  
tem.



tempfit, gratis Religioſam vitam  
arripuit.

5 Hæc eſt fædiſſima lepra; hic  
eſt cordis Religioſorum nequiſſimus  
vermis propria voluntas, ſenſus eſt  
S. Bernardi ſerm. 7 de Reſurrect.  
quam Chriſtus Dominus vitare nos  
ſuô exemplo docuit, dum dixit ad  
Patrem; Non mea, ſed tua volun-  
tas fiat. Matth. 26. 42. Si enim Chri-  
ſtus Dominus voluntatem ſuam tam  
ſanctam abiecit, ut eam æterno Pa-  
tri reſignaret, quantò magis nos, ut  
DEO ſubdiſi ſimus, noſtras debe-  
mus abnegare voluntates.

6. Crucis bajulatio, nihil ali-  
ud eſt, quàm perfectæ, & aſſidua  
carnis, & animæ mortificatio, ut in-  
quit idem Bernardus ſerm. de mo-  
do beſè vivendi: *Qui crucem por-  
tat, debet mundo mori; nam crucem  
ferre,*

ferre, est semetipsum mortificare. Quod ipsum confirmat S. Dorotheus, dum ait: Quid est aliud crux, quam vera mortificatio, quæ à nobis exigitur per fidem, quam habemus in Christum Crucem tollere, inquit Beatus Laurentius iust. nihil est aliud, quam carnalibus desiderijs, quæ adversus animam militant reluctari. Talia autem desideria sunt, quæ nos & ad peccata inclinant, & ab omnibus abducunt virtutibus, & ad impatienter ferendas adversitates incitant.

7. Tandem imitari debes Christum Dominum, qui te ad hunc Statum vocavit Religiosum in omnibus virtutibus, & vel maximè in patientia Nam cum Religio juxta S. Bernardum, sit continuum, sed lentum martirium, contra omnes adversitates,

tes, quæcunque Religioso accidere possunt, armis sanctæ patientiæ se præmunire debet. Quod olim Spiritus S. per os Sapientis Eccl. 2. 1. dixit: *Fili, accedens ad servitutem DEI, præpara animam tuam ad tentationem.*

8. Hoc sibi propriè dictum putet Religiosus, ut in servitio DEI, hoc est, in Statu Religioso, non expectet mundanos favores, & delicias, sed cruces, & tribulationes continuas, sive à Superioribus, sive à Fratribus, sive ab inferioribus, quibus DEUS dilectos suos, & purgare à peccatis, & solidare in virtutibus, & augere incrementa meritum, & coronas gloriæ illius cælestis præparare solet.

9. Hæc ergo Dilectissime in Christo Frater Professande solidè  
con-

confidera; ad hæc te præpara, & resolve: & si bene ea expleveris, verum, & vivum membrum Christi in Statu Religioso eris.

Modò autem quæro ex te &c.  
vid. fol. 5.

## EXHORTATIO IX. ad unum.

*Renovabitur ut aquile juvenus  
tua. Plal 105. 5*

1. **S**I cui magis quadrare possunt hæc sacra Scripturae verba, tunc tibi Dilectissime in Christo Frater Professande, qui juveniles tuos annos nulli voluptati, nullis mundi lenocinijs, nulli vanitati, sed DEI majestati, cultui, & amori ejus sacro, Divinissimi Spiritus impulsu consecrare decrevisti.

2. Sed quia necdum es bene infor-

informatus, & plenè, quibûs modis ac mediis juventutem tuam aptam DEI servitio, capacem vitæ perfectæ, & Religiosæ exhibere possis: ut certò agnoscas, quid sit perfectè vivere, vel unde petenda sit renovationis tuæ idea, cui tu tua omnia conformare debebis in futurum, qui te informabunt abundè, magistros tibi statuo sequentes.

3. Primus magister, sit conscientia tua. Sic enimverò aurei oris Doctor S. Chrysostomus ajt: *Sufficientem magistrum habemus conscientiam, & fieri non potest, ut quis illò adiumentò privetur; nam simul cum formatione hominis insita est, faciendorum, & non faciendorum scientia.*

4. Confirmat hoc ipsum Alvarez cuidam Religioso scribens: *Non negli-*



*negligas internam morum reformati-  
onem, nec magistrum ipsum internum,  
qui sensum ingerit, quid sequendum,  
quid fugiendum, quid tolerandum sit.  
Si ergo hæc tam importuna accusa-  
trix, & delicatastrarum actionum  
inspectrix, nullius nos criminis arguit,  
nullum aliquod peccatum reprehen-  
dit, tunc rectè nobis quadrabunt ver-  
ba Doctoris Gentium D. Pauli Apo-  
stoli 2. Cor. 1. Gloria nostra hæc est,  
testimonium bonæ conscientiae no-  
stræ.*

5. Secundus magister sit, e-  
xempla Sanctorum. Virtutes enim  
Sanctorum in terris annotatæ, si se-  
cundum sensum B. Laurentij Just.  
loquamur, sunt tamquam luminaria  
in opaca noctis caliginè viatoribus  
velut altera pharos exposita, quâ si-  
nè offensione pergere, & ad suæ  
pere-

peregrinationis finem securè quisquè  
pervenire possit.

6. Revera Sancti omnes solida nobis per vitæ suæ integritatem reliquerunt exempla, ut eos pro posse nostro imitantes, profectum aliquem spiritualē percipiamus. Quemadmodum enim carbones mutuò se accendunt, ac citius, & vehementius ignis naturam concipiunt; ita qui Sanctorum vitam seriò advertit, illorum exemplis citius ad omnem accenditur virtutem.

7. Ibi enim videbit bona opera, devotiones, mortificationes, jejunia, vigiliæ, patientiam, humilitatem, labores continuos, nullum otium, obedientiam, quibûs virtutibûs illi regnum cælorum sibi compararunt, prouti Ecclesia canit: *Omnes Sancti quanta passi sunt tormenta, ut*  
seu-

*securi pervenirent ad palmam.*

8. Tertius magister, sit vita Christi Domini, ad quam moribus nostris exprimendam aspirare debemus. Non sufficit nobis vivere more Christianorum, quia Christus Dominus vult nos perfectiores esse, quos ad suum servitium, id est, ad sacram vocavit Religionem.

9. Hæc potissima, si fas est credere Laurentio Iustiniano, Incarnationis Verbi Divini causa fuit, quatenus per assumptum hominem documenta saluberrima tribueret DEUS, quibus peccator amissa recuperaret bona; deformitatem reformaret; imaginem Christi in se exprimeret; & ad cælestem, à qua multum elongaverat, remearet patriam.

10. Desiderat enim DEUS nos esse simillimos in virtutibus Filio  
suo

suo Domino nostro JESU Christo. Et hinc non immeritò S. Bonaventura inquit: *In omnibus virtutibus, & bonis moribus propone tibi semper clarissimum speculum, & totius sanctitatis perfectissimum exemplar. scilicet vitam, & mores Filij DEI Domini nostri JESU Christi, qui ad hoc nobis de celo missus est, ut ostenderet nobis viam virtutum, & erudiret nos per semetipsum, ut ad morum eius similitudinem, per imitationem reformemur.*

II. Ultimus tandem magister tuus, tuæquæ vitæ Religiosæ, sint Regulæ, Statuta, & ordinationes. Ista te docebunt, quæ te facere oportebit, quæ vitare. Hæc te informabunt, quomodò vitam tuam, mores tuos componere debebis, dum per imminentem Professionem tuam,

to-

totum te divino mancipabis obsequio æviterne.

12. Quare, si quando aliquid videbis in te discrepare, ac displicens magistris tuis, doctrinæque eorum, solidè cura, ut hoc totum aboleas, vites, & emendes. Quanto autem conformius his præceptis magistrorum tuorum vixeris, tanto facilius culmen perfectionis assequeris. Quod, dum à te sperat Mater Religio, ego inquirō si ex animo devoto, & spe perseverantiæ, optatæque salutis affectu, petas ipsam Professionem!

## EXHORTATIO X. ad unum.

*Idem Dominus omnium, dives in omnes. Rom. 10. 12.*

1. **N**ON ita cælestis Regis nostri  
DEI divitias asserit magnus

D

Do-



Doct̃or Gentium D. Paulus Aposto-  
lus, quasi Regum sæculi, quæ sua  
distributione minuuntur, sed tantas  
describit, adorat, & publicat, quòd  
quamvis eas continuo det, & distri-  
buat, sicut defactò dat, & distribuit,  
nunquàm tamen deficit, nec defice-  
re potest. Quamvis omnes homines  
immensis sanctitatis suæ facultatibus  
ditet, extollat illos ad honorem  
magnatum aulæ suæ, evehat ad cha-  
rissimorum filiorum dignitatem (ma-  
gnæ hæ sunt expensæ divitiarum)  
nihil tamen deficit, nihil imminuitur  
divinæ gratiæ, & liberalitati.

2. Habet ille adhuc unde ex-  
pendat, cùm omnes homines ex do-  
no liberalis gratiæ suæ vocat ad exi-  
miam virtutem; vocat ad vitæ san-  
ctitatem, allicit ad perfectionem; in-  
vitat ad præmium, & coronam.

3. Ut

3. Ut autem divina illa liberalitas, & providentia hoc totum non tam verbis, quàm factis confirmaret, & ut possibilem viam ad illam coronam immarcescibilem perveniendi etiam tepidis, & æternæ salutis oblitis, credibilem faceret, plurimos mortalium in omni ætate, ac Lege sic disposuit, ut aliquos cujuscunque status perfectos, ac sanctos efficeret, & veluti in medium produceret, in quibus divitias suæ majestatis, & dignitatem, ad quam ascendere potest humana conditio, palam, & evidenter ostenderet.

4. Sic per immensas gratiarum divinarum divitias, Abèl virgo innocens factus; Enos supremus Sacerdos, qui primò cæpit invocare nomen DEI; Iob justus; Moyse dux populi DEI; David vir secun-

Da dum

dum cor DEI. Hos sequitur Apostolorum chorus, Martyrum acies, Concio Pontificum, Doctorum numerus, Confessorum Ordines, Virginum turmae. Hi omnes tamquam splendidissima sanctitatis fulserunt lumina per divitias gratiae divinae.

5 Quid amplius dicendum est de viris ascetis qui immensis gratiarum divinarum acjuti divitijs, ad sanctitatem vitae pedibus, ac manibus raptando ascenderunt; de mundo spolia, de carne victoriam, de diabolo triumphum reportaverunt?

6. Non eis impedimentum fuit adversa valetudo, non corporis imbecillitas, non dolor capitis, non raucitas pectoris, non languor membrorum, ut talia eos à cæpto sanctitatis, ac perfectionis cursu detinerent alta mente retinentes, quod

Gen-

Gentium Doctor. 2. Cor 12 9. &  
10. dicit: *Virtus in infirmitate perficitur Cum infirmor, tunc potens sum.*

7. Quod si hi ad tantam perfectionem gratiâ DEI suffulti pervenerunt, hoc ipsum reliquos inter & tu Dilectissime in Christo Frater Professande assequi poteris, dum modo putridas mundi delicias non cupieris; mundum immundum in te jugulaveris, proprium velle, utpote vinculum liberæ mentis, abnegaveris; fervorem solidarū virtutum foveris; tuis passionibus tibi prædominari non permiseris; dum te DEUS non melle, sed felle; non lætitia, sed afflictione; non otio svavi, sed amarō negotiō perficere voluerit, non murmuraveris, non in querimonias iveris! Difficilia hæc quidem erunt, sed præmia æterna sequentur. Quæ,  
ut

ut fortiaris animitùs præcor.

Modò autem quæro ex te &c.  
vid fol. 5.

## EXHORTATIO XI. ad unum.

*Qui manet in charitate, in DEO  
manet, & DEUS in eo. 1. Joann.  
4. 16.*

1 **O** Rnamentum pulcherrimum animæ Religiosæ, tamquam veræ sponsæ DEI, est vitæ perfectio. Sed quæro ubinam inveniemus tam pulcherrimam, & pretiosam margaritam; ubi sponsam charissimam reperiemus, in cujus amplexu inseparabili posita est vera, & tota vitæ felicitas spiritualis.

2. Quis ostendet nobis locum sapientiæ; quis monstrabit locum intelligentiæ; quis revelabit ubi pascat,  
ubi



ubi cubet in meridie, nè vagari incipiamus post greges sodalium, id est, post alias virtutum actiones, quæ quidem reficere animam Religiosam possunt, ducere ad reginam, & sponsam tantis quæsitam laboribus valent, quietare, tamen, satiare, & inebriare haud queunt!

3. Certè ibi quærenda, & invenienda est, ubi simul & gratia DEI sit, & finis præceptorum ejus Hæc est charitas DEI, hæc est dilectio proximi. Hæc est pretiosissima gemma, hic est incredibilis pulchritudinis unio, hæc est inæstimabilis margarita, quâ DEUS propter se, & proximus propter DEUM amatur.

4. Hæc est, inquam, gemma pretiosissima, quæ nos a gratia DEO gratos faciente nusquam poterit separare. Charitati enim soli convenit

nit gratia, competitquè; quia eam non sterilis mater peperit, sed fecundissimus genuit uterus Spiritus Sancti dicente Apostolo Rom. 5. 5. *Charitas DEI diffusa est in cordibus nostris per Spiritum Sanctum, qui datus est nobis.*

5. Charitas sola continet præceptum DEI, quæ omnes obligat; universos stringit, & in nullius qui salvari vult libera voluntate relinquitur; nam hoc est maximum, primumquè mandatum: *Diliges Dominum DEUM tuum ex toto corde tuo, & in tota anima tua, & in tota mente tua, & proximum sicut teipsum.* Matth. 22. 7. & 39.

6. Charitas unit nos DEO, juxta Scripturam: *Qui manet in charitate, in DEO manet, & DEUS in eo.* Jungit nos ultimo fini,  
cui

cui juncti, & uniti totius sanctitatis  
 fonti, & totius iniquitatis consum-  
 ptori, quid nisi sumus sancti, & per-  
 fecti evadamus juxta D. Bernardum  
 serm 83 in Cant. dicentem: *Si cha-  
 ritate anima Religiosa DEO nubit, si  
 charitate non iam per alios, sed per  
 seipsam ad DEUM accedit; si chari-  
 tate DEO adheret; si affectuum bra-  
 chijs ipsum astringit, & DEUM nun-  
 quam separanda complectitur, quid  
 illi deerit, ut ad fastigium virtutis,  
 id est, ad perfectionem ascendat?*

7. Quapropter Dilectissime in  
 Christo Frater Professande, dum  
 jam ad sacram Professionem pro-  
 peras, si jam perfectionis culmen a-  
 scendere cupis, scito optimè, hoc  
 per solam charitatem fieri posse. Ast  
 hoc quoque tibi benè notandum,  
 quòd quicumque veræ charitatis est  
 parti-

particeps, omnium horum, finè quibus salus æterna obtineri non potest, in se exprimere debeat actiones.

8. Vitanda tibi erunt peccata, nè charitatem perdas; sensus pravi affectusquè ad devia trahentes cohibendi, ut charitatem tuam & à tentationibus liberam habeas, & eam per virtutes sectandas augeas. Oratio, & contemplatio frequentanda, ut adimpleas charitatem. Præcepta, & Statuta, Regula, & Constitutiones servandæ, ut ad perfectionem pervenias charitatis. Cor purum, & conscientia secura custodienda. Charitas enim, quæ cor ab omni criminis contagione purgat; quæ conscientiam, omnium mandatorum observatione purificat, est omnium bonorum operum; est omnium laborum sanctorum scopus, & meta, atque-

què adeò ipsa est animæ Religiosæ  
sanctitas, & perfectio.

9. Hanc ergo tibi solidè pro-  
cura, ut per eam ardeat cor tuum  
igne amoris divini, ut rubiginem in  
te consumat peccatorum; ut refor-  
met mores tuos; ut pessimas abole-  
at consuetudines; ut tollat vitia;  
plantet, & inferat virtutes; ut te ho-  
minem DEO indissolubilî copulet  
vinculô amoris; sicquè sanctus, &  
perfectus evadas Religiosus. Quod,  
ut suum sortiatur effectum, candidè  
exopto.

Modò autem quæro ex te &c.  
vid. fol. 5.

## EXHORTATIO XII. ad plures.

*Nolite conformari huic sæculo.*

Rom. 12. 2.

1 **Q**ui sanæ est mentis; qui bonæ  
erga



erga DEUM, & amorem ejus, ac propriæ salutis voluntatis, nunquam huic sæculo nequam gestiet adhærere. Nec enim hujus nequam sæculi sufficienter describi, vel explicari potest, quanta ejus astutia, quanta perversitas in perniciem generis humani.

2. Quid enim est hoc sæculum, nisi locus commotionis; fons inquietudinis seminarium turbationis? Locus commotionis, ubi homo quasi flos egreditur, egressus autem non permanet, sed statim conteritur, & fugit velut umbra. Fons inquietudinis, à quo tot curæ manant; tot sollicitudines rerum temporalium fluunt; tot iræbecillitates, & corporis morbi procedunt, quæ animum cruciant, & pacatum esse non sinunt. Seminarium turbationis; nullus enim  
est

est amator mundi, qui aut desiderijs eorum, quæ non habet, aut timore amittendi, quæ habet, non perturbetur.

3. Quid est hoc, inquam, sæculum, nisi rota quædam volubilis omnia movens, universa consumens, & conterens, in qua nihil est, quod stabile, & constans perseveret!

4. Quid miserabilius hoc mundo, cujus fructus ruina est! Hodie quempiam honoribûs extollit; postera die ignominiâ, & infamiâ deiecit. Nunc opibûs, ac rerum temporaliû fortunis augetur; statim verò penuriâ, & mendicitate premit. Nunc amicorum, & familiarium turbis circumdat; & in ictu oculi solitarium, & inglorium derelinquit.

5. Quid tandem est hoc sæculum, nisi periculosum mare, in quo  
pas-

passionum furit, sæva tempestas; strident curarum, ac sollicitudinum fluctus; tentationum, periculorum animæ, & corporis demergunt aquæ; adeò: ut nullus sit mortalium, qui omnino illæsus persistat. Quod ipsum optimè D. Augustinus term. 2. confirmat, dum inquit: *Plena sunt omnia periculis; plena laqueis; incitant cupiditates; insidiantur illæcebræ; blandiuntur lucra; damna deterrent. Inde sævit odium; hinc decipit mendax obsequium. Nullus est secularis status, qui non innumerabilibus periculis sit expositus; nullum negotium, quod non sit mille laqueis circumdatum. O munde immunde! (clamat ulterius nominatus S. Pater) O nequam sæculum, quàm insipiens est, qui te amat; quàm temerarius, qui te*

*non horret; quàm sui oblitus, qui tuos non fugit laqueos!*

6. Unde vos Dilectissimi in Christo Fratres Professandi benè vobis consuluitis, qui ad sacram aspirando Religionem hoc nequam sæculum fugistis. Sapienter fecistis, qui miserum mundanorum statum deseruistis; qui à Patria hac proditricè civium suorum aufugistis, & aliam vobis, nempe sacram Religionem elegistis. Eapropter si idem vobis est animus modò, quem in principio vestræ vocationis habuistis, quæro, utrum toto corde, sincera mente DEO famulandi, & salutem animarum vestrarum quærendi, sacram petatis Professionem.



EX-

## EXHORTATIO XIII. ad unum.

*Ambula coram me, & esto perfectus.*  
*Gen 17. 1.*

1. **Q**UOD DEUS omnipotens, non procul ab orbe condito suo fideli Abrahamo dixerat: *Ambula coram me & esto perfectus*, hoc omni homini, ac præcipuè Religioso, ad perpetuum ejus servitium anhelanti, inculcat: *Ambula coram me, & esto perfectus.*

2. Quòd si DEUS omnipotens omnes homines, & vel maximè Religiosos ad eximiam virtutem vocat, ad sanctitatem allicit, ad perfectionem invit, non denegabit assequendi gratiam, non impediet ascendendi facultatem, non frustrabit auxilio.

3. Qualis namquè esset invitatio,



um. tio, verbô vocare, doctrinâ instrue-  
 re, impulsibus, & afflatibus trahere;  
 erfe. ad epulas cælestes invitare, & vo-  
 lentibus, ac venientibus januam  
 non claudere!

fuo 4. Non claudit DEUS, sed i-  
 bula psi Religiosi vanis se prætextibus ex-  
 cufantes, viam sibi ad perfectionem  
 nni. ferâ socordiæ; ferâ negligentia; mayo-  
 ad ri rerum temporalium sollicitudine;  
 anti, amore deliciarum, occludunt.  
 esto

tens 5. Luc. 14. Invitati quondam  
 Re. homines à Cælesti Patrefamilias ad  
 vo. cænam magnam, & pompofam, velu-  
 per. ti ingrati illo affectu, sic se excusa-  
 t af. runt. Primus dixit: Villam emi, &  
 t a. necesse habeo exire, & videre illam.  
 abit Secundus dixit: iuga boum emi  
 ita. quinque, & eo probare illa. Tertius  
 dixit: uxorem duxi, & ideo non pos-  
 sum venire.

E

6. Si-

6. Simili quasi modo vocati Religiosi ad statum spiritualem à DEO, ab illius perfectione se excusant, dum mundanæ ambitionis appetitu inescati; bonorum temporalium cupiditate distenti; carnis illecebris obstrusi, seipsum ab amore perfectionis abducunt, & vias sanctitatis ambulare detrectant non attendentes ad verba D. Thomæ Aquinatis qui ait: *Status Religiosorum, Status est perfectionis, & hominum ad perfectionem tendentium.*

7. Omnes etenim res non solum rationis expertes, sed etiam inanimatæ, amant suam perfectionem, eamquæ præcipuè appetunt; in eam omnibus viribus, ab Authore datis, nituntur. Animalia, omnia, quæ sibi nociva sunt, fugiunt; quæ ad alimentum, aut medicinam utilia, avidè cupi-

cupiunt: filios natura ducce, ac si pietatis essent compotes, maximâ quâdam diligentia nutriendi, & adhuc imbecillos in omnibus periculis protegunt.

8. Quid ergo facere non debeat Religiosus rationis compos; à mundo avulsus; a sæculi vanitatibus abductus; non ad res temporales factus, sed ad æternam beatitudinem; ad DEI visionem; ad cælestis gloriæ possessionem præordinatus, nisi suam perfectionem quærere; in illum finem, propter quem creatus est, totâ mentis industriâ contendere; toto cordis affectu suspirare; recentissimâ memoriâ verba DEI ruminare: *Ambula coram me, & esto perfectus!*

9. Quare Dilectissime in Christo Frater Professande, dum ad hanc perfectionem vitæ spiritualis mox

Es

per

per emittendam Professionem aspiras, quæro ex te primò, secundò, & tertio canonicè, utrum hanc Professionem amore hujus perfectionis, zelò gloriæ DEI, & affectu animæ tuæ salutis, petas?

#### EXHORTATIO XIV. ad plures.

*Exemplum dedi vobis, ut, quemadmodum ego feci vobis, ita & vos faciatis. Joann. 13. 15.*

1. **T**Andem post feliciter terminatum vestræ Dilectissimi in Christo Fratres Professandi annuæ probationis tempus, quid factu opus sit? Non meis, sed Salvatoris nostri Domini JESU Christi manifesto verbis, qui dicit: *Exemplum dedi vobis, ut, quemadmodum ego feci vobis, ita & vos faciatis.* 2.

2. Dum ad sacram Professionem emittendam aspiratis, scitote, quia hâc emissâ eritis obligati, ut vestrum, & omnium nostrum sequamini Magistrum, si ad culmen perfectionis Religiosæ pertingere desideratis.

3. Plurima quidem possunt dari exempla, quæ dignum est, ut sequamur nos vitam Religiosam; vitam sanctam; vitam perfectam professi, sed si ex rivulis bibendum est, cur non ex ipso limpidissimo fonte bibamus? Si à discipulis videmus quid addiscendum, cur non ab ipso Magistro doceamur?

4. Certè hoc ipsum documentum tanti est, ut ipsum solum, si bene, & diligenter observetur, adesse quandam maximam perfectionem, sufficiat.

5. Chri-



5. Christus etenim Dominus noster datus est nobis non tantum in Redemptorem, qui nos redimeret; in Magistrum, qui nos doceret, verum etiam in exemplar, cujus vita nos ad omnem instrueret perfectionem.

6. Adquid enim ille Rex summus, & verus DEI filius; fons, & origo omnis sanctitatis, qui ad infinitam sanctitatem, quam à momento suæ conceptionis habuit, conservandam, nullò prorsus indigebat mediò; nullò motivò; nullâ doctrinâ, tantas exercuit virtutes; tantam humilitatem; tantam modestiam; tantam mansuetudinem; tantam patientiam; tantam pietatem? nisi, ut nobis exemplum præberet omnis justitiæ, & exemplar exhiberet universarum virtutum, ut inquit Princeps

ceps ille Apostolorum: In hoc enim vocati estis: quia & Christus passus est pro nobis, vobis relinquens exemplum, ut sequamini vestigia eius. 1. Petr. 2. 21.

7. Quod ipsum confirmat Doctor Gentium Paulus Hebr. 12. 1. & sequ. dicens: Et nos tantam habentes impositam nubem testium, deponentes omne pondus: & circumstans nos peccatum, per patientiam curramus ad propositum nobis certamen: aspicientes in Authorem fidei, & consummatorem JESUM, qui, propositio sibi gaudio, sustinuit crucem, confusione contempta, atque in dextera sedis DEI sedet. Recogitate enim eum, qui talem sustinuit à peccatoribus adversum semetipsum contradictionem: Ut nè fatigemini, animis vestris deficientes.

8. Unde vos Dilectissimi in  
Chri-

Christo Fratres Professandi, dum profiteri DEO vitam vestram Religiosam intenditis, hoc vobis seriò præ oculis mentis vestræ ponite; hoc vestrâ memoriâ fortiter tenete, ut, si vultis sicut debetis ad vitam perfectam tendere, Christum Dominum in virtutibus imitamini. Servate patientiam in omnibus sicut ille; humilitatem erga omnes sicut ille; modestiam ubiquè sicut ille; pietatem sicut ille. Si orabitis, Christi reverentiam, & attentionem, ac fervorem, attendite; si loquimini, Christi modestiam in loquela custodite; si corpus cibò, potuquè reficietis, Christi abstinentiam, & sobrietatem servate; si aliquod operabimini opus, facite secundùm exemplar, quod vobis monstratum est in monte Christus JESUS, taliterquè actiones vestras

stras perficere studeatis, ut illi placeant, & vobis præmium concilient æviternum, Quod, ut vobis feliciter contingat, toto p. ctore exopto.

Modò autem quæro ex vobis  
&c. vid. fol 5.

## EXHORTATIO XV. ad unum.

*Qui autem perseveraverit usquè in finem, hic salvus erit. Matth. 10. 22.*

I **G**Ravium virorum, magnæ hominum prudentiæ, Excellentissimorum Ascetarum, Doctissimorum Sapientum, Sanctorumquæ Patrum commune axioma est: *Finis coronat opus*. Et verò:

2. Frustra excelsiæ eriguntur cogitationes, si aliquando veniant ad depressum. Gratus seraphici eliciuntur

tur affectus, si post pauxillum temporis sequantur defectus. Nihil valet zelosa orandi intentio, si in medio orationis aderit voluntaria distractio. In cassum abit sancta vitæ spiritualis inchoatio, si non aderit constans virtutum, pietatis duntaxat, charitatis, devotionis, humilitatis, modestiæ, patientiæ &c. exercitatio: *Finis coronat opus*. Non primi impetus ad omne opus, sed sola in illo perseverantia coronatur.

3. Quare, qui vult omnia, de quibus à suo Magistro Spirituali, per annum sui Novitiatus probationem instructus, ac edoctus fuerat, servare, debet in vitæ suæ ratione constans effectus, se ad mentis, & cordis constantiam; ac operis perseverantiam serio accingere.

4. Quid enim proderit domus  
fun-



fundamenta jacere; parietes in altum erigere, nisi super impositio tectum, habitatio usque ad finem perficiatur. Ita nihil ad perfectionem assequendam vitæ Religiosæ; vitæ spiritualis, prodest, in Novitiatu Religiosæ vitæ fundamenta perfectionis per sui contemptum, & humilitatem, ponere; nihil prodest virtutem quamcunque exercere, nisi eam constans perseverantia quasi tectum aliquod operiat, contegatque.

5. Perseverantia est, quæ semper ad finem operis nititur, & nihil ceptum, aut semifactum relinquit, sine qua ipsum spiritualis vitæ finem, qui est perfectio religiosa, nemo procul dubio assequetur. *Vincenti dabo manna absconditum, & dabo illi calculum candidum. & in calculo nomen novum scriptum, quod nemo scit,*  
*nisi*

*nisi qui accipit. Apoc. 2. 17.*

6. Ergo evidenter patet, quòd qui à fervore novitiatico, quiquè virtutibus ab aquisitis; qui ab observantia, & pietate retrocedet, nec manna absconditum perfectionis, nec nomen novum sancti, ac perfecti Religiosi, quod Christus Dominus nobis aquisivit, accipiet.

7. Imò morale quoddam monstrum apparebit odibile DEO, & Religioni: ut qui fuit antea, vel speciem saltem posuit in se viri devoti, postea negligens, ac somnolentus; qui ante humilis, postea arrogans, & superbus; qui antea fuit mansuetus, postea contentiosus; qui fuit patiens, postea malitiosus, ac furibundus; qui fuit obediens, postea capitosus, ac rebellis; qui fuit pacificus, postea rixosus, ac turbator Fratrum inquietum.

tumquè subjectum; qui fuit sobrius, postea potator; qui fuit disciplinatus, postea insolentissimus. Hypocrita talis, non Religiosus; seductor suæ animæ, non perfectionis studiosus; gravamen Matri Religioni, non solamen, & decus.

8. Solis in bono; in vita Religiosa; in vita sancta; in observantia mandatorum divinorum; Statutorũ; Regulæ, perseverantibus corona promittitur juxta D. Paulum 2. Tim. 2. 5. dicentem: *Qui certat in agone, non coronatur, nisi legitimè certaverit.*

9. Non igitur perfectionis corona dabitur; qui utcunquè in Statu Religioso certaverit, sed qui constanter certaverit, & juxta hanc perseverantiæ legem exercitationi institerit virtutum.

10. Testatur hoc Doctor Gentium Paulus 1 Cor. 9. 24. scribens: *Nescitis quòd ij, qui in stadio currunt, omnes quidem currunt, sed unus accipit bravium!* Quis est iste unus, qui accipit bravium in terreno certamine, nisi ille, qui usquè ad metam currit, & alios præcurrit currentes!

11. Ita similiter ad perfectionis metam; ad bravium illud cæleste; ad gloriæ coronam æternæ aquirendam, non sufficit Religioso currere in stadio Religionis, nisi usquè ad finem currat, ac omnes tepidos, & imperfectos præcurrat.

12. Certè perfectio vitæ Religiosæ, est ille thesaurus infinitus, qui nos & DEO gratos, & honorabiles efficit hominibus, de quo sic legitur Sap. 7. 14. *Quò qui usi sunt, participes facti sunt amicitie DEI,*

*pro-*

*propter dona disciplinæ commendati.*

13. Hinc nūl poterit deesse illi, qui DEUM amicum habet; nulla re indigebit, qui DEUM ipsum, & ejus gratiam, ac amicitiam possidet. Quis non magno honore illum afficiet, quem DEUS in hac vita prosequitur honore, & in alia magnificat propter custodiam disciplinæ vitæ perfectæ?

14. Tu itaque Dilectissime in Christo Frater Professande, si desideras palmam perfectionis obtinere, magna tibi cura inesse debet, ut in eo, quod incæpisti, perseveres; nam plurimi sunt, qui, cū bene cæperint, pessimè finiverunt. Studendū tibi proinde erit virtutibus, quæ ornant Religiosos, aquirendis; vitijs omnibus, quæ deturpant Religiosos, abjiciendis; constanter in observan-



tia sacrae Regulæ, statutorum Ordinis; mandatorum Superiorum perseverare, ut perfectus quondam evadas Religiosus. Nequè enim poterit quis consummationem virtutis attingere, nisi voluerit in ipsius exercitatione perseverare.

15. Quare si ad hæc, quæ tibi proposui, habes animum, dic mihi, utrum ex animo DEO serviendi, & animæ tuæ salutem assequendi, petas sacram Professionem?

## EXHORTATIO XVI. ad plures.

*Appropiate ad me, & congregate vos in domum disciplinæ. Eccls.*

51 31.

1. **R**es magnæ, & obtentu difficiles, quæ non communi labore, nec ordinaria diligentia, sed solida

lida industria, & eximijs conatibus  
 aquiruntur, ardentissimis desiderijs  
 optandæ sunt, quæ homines rerum  
 optimarum cupidos in laborum to-  
 lerantia confirmant, & difficultates  
 ejus, quod cupiunt, assécutioni ob-  
 sistentes, strenuè superent, & vin-  
 cant. Tepida enim, & infirma desi-  
 deria; languidi, & debiles conatus,  
 modica etiam insurgente difficultate  
 extinguuntur.

2. Quid ergo, rogo, majus po-  
 test esse, ac summè desiderabile su-  
 pra sanctam, quietam, tranquillam,  
 ac beatam vitam Religiosam perfe-  
 ctam? Quam quantis laudibus; quan-  
 tis elogijs extollunt SS. PP. ! Le-  
 gantur non folia, sed tomi; non fi-  
 leræ, sed panegyres.

3. Verum quidem dicendo, &  
 hominum conditionem attendendo,

F

dice.

dicere possum, non esse facile humano cordi veris, & efficacibus perfectionis desiderijs ardere, & illorum vi ad quærendam perfectam Religiosam vitam incitari; quia natura nostra depravata peccatis, & inordinatis affectibus irretita; amor rerum mundanarum asveta, his, quasi catenis quibusdam vineta tenetur, nè in altum volet, & in desiderium vitæ sanctæ; vitæ Religiosæ, perfectæ, ac beatæ assurgat.

4 Ferme ita hac in parte nobiscum agitur, quemadmodum cum homine vili, & simplici rustico, qui inter boves, & aratra, inter vomeres, & terræ glebas, educatus, nuppiam de regno cogitat; nunquam Principum dignitatem desiderat: ita prorsus nos filij Adæ, ob delictum Patris, hâc pænâ mulctati, amoris o-  
pum,

pum, honorum, ac voluptatum aſve-  
ti, non ita facilè poſſumus nos hiſce  
amoribus expedire, exvincularequè  
deſiderijs, ut paupertatem Chriſti;  
vitæ aſperitatem; mundi contem-  
ptum; opera vitæ ſpiritualis; vitæ  
perfectionis, ex corde amemus, ac  
deſideremus.

5. Sed facilè amor horum ex-  
citari poterit de duro cordis noſtri  
ſilice; facilè ignis deſiderij eorum  
accendi poterit; facilè ad capeſſen-  
dam viam vitæ perfectionis allici poſ-  
ſumus, ſi bene, ac ſolidè conſidere-  
mus, & advertamus ea, quæ nos ab  
hoc ſancto arcent, vel retardant ſal-  
tem deſiderio.

6. Maximùm eſt, ignorantia  
perfectionis, cujus amplitudinem,  
& majeſtatem quia non bene cogno-  
ſcimus, non, ut par eſt, perpendi-

F a mus,

mus, non in magno pretio illam quoquē habemus. Et quia ejus æstimatione caremus, ideo nihil de possessione illius curamus.

7. Evenit hoc quoquē nobis, quod pueris prudentiā carentibus, qui, cum arma militum vident; cum hastas, & gladios cernunt, quia hæc viribus illorum imparia sunt, flocci ea pendunt, & suos rusticales baculos his omnibus præferunt. Ita nos miseri homines, qui pretium perfectionis vitæ nescimus; qui summam ejus excellentiam ignoramus, nullō etiam ejus desiderio tenemur.

8. Vos igitur Dilectissimi in Christo Fratres Professandi, qui expletō Novitiatus vestri annō, hodie, & nunc quidem, ad sacram acceditis Professionem, seriō advertite, ut, quæ per annuam vestram probatio-

nem



nem non explevistis; quæ nondum didicistis, in ulteriori vitæ vestræ tractu sollicitè dilucatis, incumbatis-quæ diligenter illis, quæ vos ad vitā valeant perducere perfectorum Religiosorum.

9. Cum enim perfectio sit maximum bonum omnibus Religiosis, ac præstantissimum omnium donorum, quæ in hac vita eis contingere possunt, ita de illa semper, æquum est, cogitate, ut ad eam DEO adjuvante, moribus bonis; operibus sanctis; virtutibus eximijs, pervenire valeatis.

10. Habete hoc semper in animo vestro, ut crescat in vobis ardens desiderium perfectionis; crescat sanctitatis vitæ æstimatio; foris exulet omnis socordia; pellatur procul turpis negligentia, & amor virescat

rescat Religiosæ Disciplinæ.

II. Quod, dum vobis iterum, iterumq; inculco, quæro, utrum ex animo devoto, & spe perseverantiæ, optataquè salutis affectu, petatis ipsam Professionem?

### EXHORTATIO XVII. ad unum.

*Juravi tibi, & ingressus sum pa-  
ctum tecum, & facta es mihi.*  
Ezech. 16. 8

I **Q**ui hanc mirabilem DEI provi-  
dentiam considerat, quâ pau-  
perculos suos protegit, atquè defen-  
dit, non sanè mirabitur, nec eam a-  
ut nimiam, aut minimè convenien-  
tem tantæ abjectioni, & paupertati  
judicabit. si dignitatem præcellam  
animadvertat, ad quam Religiosi  
vocati, & evecti sunt.

2. Ne-

2. Nequè enim DEUS Religiosas animas in statum tantum servorum suorum, amicorum, & filiorum admisit; sed in aliam dignitatem, majorem, & nobiliorem extulit, dum per sacram emissam Professionem, eos sibi in dilectissimam Sponsam assumpsit. *Juravi tibi, & ingressus sum pactum tecum, & facta es mihi.*

3. Hæc autem est dignitas Sponsæ, quâ nulla excellentior, aut nobilior dari potest non modò, sed nec præstantior excogitari valet. Amici quippe Regum, aut filij, non statim Reges fiunt, nequè regni potestate potiuntur, aut sponsa æterni Regis nempe DEI, anima Religiosa, ipso actu suæ Professionis, ex conditione tantæ dignitatis, fit Regina, quæ à dextris Regis sedeat in vestitu de.

tu deaurato, circumdata varietate, ipsô thronô, & vestitu si non æqualem, tamen eximium honorem, & amplissimam ostendens dignitatem.

4. Amicorum hoc est elogium, ut sint pretiosi illorum thesauri, ut dicit Scriptura Eccli. 6. 14. *Amicus fidelis protectio fortis, & qui invenit illum, invenit thesaurum.* At sponsæ DEI, hoc est, animæ Religiosæ professæ, major, & nobilior laus est reservata, ut non diversa res, sed eadem cum Sponso, nempe DEO, computetur.

5. Gen. 2. 23. Admiratus primus generis humani parens Adam sibi à DEO oblatam consortem, ac sociam ait: *Hoc os, de ossibus meis, & caro, de carne mea.* Certè Christus Dominus istud amoris verbum dicit felici animæ Religiosæ professæ,

sæ, quam non tantum in filiam sibi adoptat, sed in sponsam adsciscit: Hoc os, de ossibus meis, & caro, de carne mea.

6. Est os, de ossibus meis, ut sit pudica; est caro, de carne mea, ut sit amica. Os, de ossibus meis, ut resistat vitijs, ac peccatis; caro, de carne mea, ut respondeat beneficijs. Os, de ossibus meis, ut custodiat constantiam, & fortitudinem in bono, in omni pietate, sanctitate, zelô divini amoris; caro de carne, ut obtineat pulchritudinem, quâ grata reddatur toti Curæ cælesti.

7. Magnum enim hoc vinculum est animæ Religiosæ professæ cum DEO; nam solennis Professio ita animam DEO, Deumq; animæ adstringit, ut nulla dari, aut excogitari potest autoritas, vel potestas;  
nulla



nulla vis, vel fortitudo, quæ vinculum istud dirumpat, vel dissolvat

8. Sed non omnes animæ justæ hoc nomine sponsæ præstantissimo dignæ sunt, atquæ dulcissimô DEI consortiô. Non omnes enim audent dicere: *Dilectus meus mihi, & ego illi*, Cant. 2. 16. ita, ut scilicet DEO soli tamquam dulcissimo Sponso intendant, & eum solum supra omnia diligant, sed si aliquæ sunt in Ecclesia sancta; in vera Orthodoxa Fide Catholica, quæ tam præcellsum nomen mereantur, illæ profectò sunt animæ Religiosæ, quæ vitam propriam sui status Angelicam, cælestem, & omni cura rerum terrenarum exutam, agunt in terris, ut S. Bernardus in Cant. scribens ajt: *Da mihi animam nihil amantem præter DEUM, & quod propter DEUM amandum est.*

est, cui vivere Christus, cuius otium,  
ac studium est, providere DEUM in  
conspectu suo semper, cui soli unicum  
solatium, ac voluntas sit ambulare  
cum Domino DEO suo, talis anima  
est digna nomine sponsæ, talis anima  
est sola anima Religiosa.

9. Quid autem præclarius est,  
quàm D E O connubio spirituali  
conjugi? quid dulcius, quàm fonti  
omnium bonorum uniri? quid secu-  
rius, quàm omnipotenti, & immuta-  
bili copulari?

10. Ut igitur te Frater in Chri-  
sto Dilectissime Professande, ani-  
mamquè tuam veram remonstres  
DEO sponsam, hoc tibi servandum  
erit, ut post emissam tuam sacram  
Professionem, non cesses à studio  
profectus spiritualis; non tepe-  
scas in via salutis; non pigres in obser-

van-

vantia Religiosa; non negligas executionem mandatorum DEI, Legū, & Statutorum tuæ Religionis, quousquē ad omnimodam non pervenias perfectionem. His seriō attende, & me certifies, si ex animo devoto, & spe perseverantiæ, optatæquē salutis affectu, petas ipsam Professionem!

### EXHORTATIO XVIII. ad plures.

*Unusquisque qua vocatione vocatus est, in ea permaneat.* 1. Cor. 7. 20.

- I. **C**OMMUNE secum fert axioma: *Dimidium facti, qui bene capit habet.* Vos Dilectissimi in Christo Fratres Professandi, Statum vitæ spiritualis vobis eligentes, capistis bene, dum per annum vestræ probati-

bationis constanter, & patienter onera, & opera Religionis sustentatis.

2. Sed necdum ex eo perfecti estis, alit ad majora vos per sacrā Professionem, ad quam nunc acceditis, resolvere, & præparare debetis. Parum ea, quæ cursu toto vestri Novitatus fecistis æstimare debetis, quia hæc initia tantum fuerunt, nec in ipsis finem vestræ vocationis ponatis, sed ulterius vobis progrediendū, donec captum opus vocationis vestræ perficientes, magnum profectū assequamini in Religione. Equidem hæc est perfecta in sua vocatione permanſio, continuus in ea per virtutes, & sanctas operationes progressus.

3. Qui aliquod opus magni momenti incipit, mirum est, quan-

ta attentione, quanta mentis vigilantia, initijs incumbat, quam, si in operis prosecutione teneret, nec à prima sollicitudine recederet, pulcherrimè, & felicissime perficeret opus: ita Religiosi, si tam sollicitè viam perfectionis sequerentur, sicut inceperunt, brevi tempore ad magnum pervenirent profectum.

4. Sed quia sæpe fit à contrario, post pauxillum temporis incipiunt tepescere; remittunt primum novitiaticum fervorem; negligunt sui vigilantiam; non superant inordinatas passionés, ideo dolendum est, quòd non proficiant, sed deficient.

5. *Vide qualis fueris prima die, quando ereptus per gratiam DEI de seculo nequam, & receptus fuisti in Claustro, talis permane* inquit Dionysius.



nysius Carthusianus. Cujus sanctam doctrinam, si profundè velint Religiosi intelligere, & perquam diligenter observare, brevè post tempus plurimùm proficerent, & divinò adjuti præfidiò facilè ad magnam ascenderent perfectionem.

6. Non est mirùm, si Tyroni Religionis, id est, Novitio veniat aliquando affectus sæculi; si lingua aliquid mundanum, vel minùs honestum proferat; si corde inflatur, vel tumescat, vel torpeat, vel aliquem affectum sæcularem ostendat, sed Religiosam vitam professus, tamquam jam totus Christi miles, has tyronum imbecillitates extra domũ cordis sui eliminare debet, linguamquè ab inquinamento ineptorum verborum custodiat; memoriam à sæculi amore abstrahat; desideria re-

rum

rum mundanarum abjiciat est necessesse.

7. Novitius est quasi infans recenter natus, cujus teneritudo majorem curam nutricis, id est, spiritualis Magistri requirit; cujus pusillanimitas acrem non sustinet reprehensionem, sed si in aliquo delinquat, lac, & mel blandioris, & mansuetissimæ correptionis exposcit. At Religiosus Professus, qui veluti jam vir adultus; qui sinè tanta Magistri cura in Religione vivit, duriora laborum onera portare, & pro levi etiam culpa, ad remonstrandam veræ religiosæ patientiæ virtutem, acerrimas increpationes sustinere debet.

8. Novitius quemadmodum arbuscula nunc sata assidua indiget irrigatione, quæ aut nimium solis ardorem, aut nimiam noctis intempe-

riem

riem non sustinet, & si ferè quotidiana præfecti admonitio desit, aut inturgat magna tentatio, velut flos sæni statim arescit; Religiosus verò jam Professus, velut procera arbor optimè per veram vocationem; per constans votum suum radicata, sinè aqua continuæ exhortationis perseverare debet, magnasquè adversitates, varias undiquè occurrentes molestias, plurima pro temporum varietate incommoda, quasi ingentes solis ardores, sustinere.

9. Vocatio ergo vestra ad sacrum hunc Ordinem, non est posita in sola votorum emissionem, sed ut semper in ea permaneatis; ad omnia perfectà, ad omne virtutis studium, ad omnes virtutes acquirendas, sinè quibus stare non potest vocatio vestra, nec vos dici poteritis veri Reli-

G                      giosi,

giosi, tendere debebitis. Nam, qui non solum manè, id est, in vitæ spiritualis exordio, sed etiam vespere, & meridie, id est, in toto vitæ Religiosæ progressu suæ correspondebunt vocationi, hi procertò audient à DEO laborum suorum remuneratore: *Venite benedicti.* Matth. 23. 34. Quod, ut & de vobis verificetur, jugiter exopto.

Modò autem quæro ex vobis &c. vid. fol. 5.

### EXHORTATIO XIX. ad unum.

*Ego autem sicut oliva fructifera in domo DEI.* Psal. 51. 10.

1. **E**Cce quàm sapientissimè regiū Prophetæ expressit personam Religiosam, quæ à curis rerum terrenarum  
rena-

renarum avulsa; à mundi erepta fraudulentijs: millenis sæculi subducta periculis; in Claustro collocata; non vacua; non veluti infructuosa arbor, aut illa fatua evangelica ficus; sed sicut oliva fructifera, DEO, & Religioni proficua esse debet. *Ego quasi oliva fructifera.*

2. Et certè hæc est summa Religiosæ personæ obligatio, ut, quæ vitam amplexa est spiritualement, in Religione velut in paradiso posita, summo conatu in fastigium conscendat pietatis. Quod ipsum ab illa vel ipse efflagitat finis, quem non alius, nisi ipse DEUS in vocatione illius ad Religionem ei constituit, hoc est, ut ad Religionem vocata super universas res creatas se efferat; sanctitatem; animi puritatem expetat, vitamquè cælestem in terris, & Angeli-

G a                      cis



cis cognatam spiritibus instituat. Quam, si sedulò non curaverit; diligenter non quæsierit; pænitiæ, patientiæ; humilitatis, avarumque virtutum fructus non facit, non minùs profectò erit vituperabilis, quàm illi infideles evangelici agricolæ Matth. 21. qui dum tempus fructuum appropinquasset, Dominum vineæ contempserunt; servos ejus plagis, & verberibus exceperunt; filium unicum crudeliter occiderunt.

3. Hoc idem facit Religiosus, qui tempore fructuum, id est, tempore vitæ DEO consecratæ fructus virtutis, ac sanctitatis, non adferunt; Dominum proventum exigentem, aspernantur; servos Domini, hoc est, suos Superiores contristant, & Christum Filium DEI unicum à  
men-

mentibus, & cordibus suis exturbant.

4. Quis enim major excogitari potest DEI vocantis contemptus, quàm ipsius assiduus non obtemperare vocibus, nec tot beneficijs, quæ singulis momentis accipit, ad virtutem capeffendam emoliri? Et quæ gravior Superioribus potest esse tristitia, quàm, si videant suos labores in corrigendo, in docendo, in exhortando deniquè pessumdari, & Religiosam Disciplinam per se omnibus summopere diligendam, conculcari?

5. Habet Religiosus, ut sit quasi oliva fructifera in domo DEI, & arbor non vacua fructu in agro plantata Religionis, magna præsidia ad vitam spiritualem, sanctam, atquè perfectam, ut sunt divinatorum Sacra-

men-

mentorū frequentatio; sacrorū  
librorū frequens lectio; pia ac de-  
vota oratio; rerū cælestium solida  
meditatio; exempla Sanctorū.

6. Hæc sunt quasi quinque ta-  
lenta, quæ DEUS Religioso con-  
fert, ut ijs negociando adferat fru-  
ctum bonæ, sanctæ, ac exemplaris  
vitæ. Nam ex Sacramentorū usu,  
puritas conscientiæ; ex librorū le-  
ctione, scientia; ex oratione, pietas;  
ex exemplis, sanctitas, & vita acqui-  
ritur perfecta.

7. Movet quoquē ipsum ad  
hanc vitam spiritualem ipse Status  
Religionis, Status utiquē sanctus,  
atquē perfectus. Hunc Statum illi  
arripiunt, qui vitam Angelicam, ac  
DEO simillimam concupiscunt; hi  
illum profitentur, quorum cordi in-  
est summa vitæ perfectio; hi illum  
foli-

solidè defiderant, qui vitam carnalem plurimis vitijs fœdatam, multis vallatam periculis, subterfugiunt, & contemnunt.

8. Movet fimiliter ad hunc Statum spiritualement; ad vitam perfectam Religioſum, & movere debet communis opinio ab univerſis ſæcularibus de viris Religioſis concepta: putant enim eos, qui ſe mundo exemerunt, homines eſſe ſanctos, atq; perfectos, nec decet hanc opinionem fallere, & per quamdam hypocriſim alios inducere in errorem.

9. Religioſus namquè appa-rens perfectus, ut non eſt, nequè ex toto eſt Religioſus, nequè ex toto mundanus, ſed velut aliquod monſtrum, judicandus.

10. Hiſtriones ſunt illi, qui non ſuam, ſed alienam repræſentant.

per-

personam, ita Religiosus, qui vitam Religiosam, quam præfert, moribus, operibus, gestis, & actionibus non tenens, aliud intus est, & aliud foris oculis insipientium se ostendit, meritòquè inter simulatores, & hypocritas numerari potest.

11. Minatur talibus Dominus per suum Prophetam Sophon. i. 8. *Visitabo super omnes, qui induti sunt veste peregrina* Quasi enim peregrinam vestem portat Religiosus, dum spiritualē portans, in Religione non Religiosā, sed sæcularē ducit vitam.

12. Quid infelicius potest contingere Religioso, quàm in loco sancto, non sanctè vivere, sed profanè; non fervidè, sed tepidè; in conclavi Christi, non cum eo, sed cum mundo colloquia miscere.

13. Vitam Religiosam solæ fov-  
vent,



vent, & nutriunt sanctæ occupationes, non ambitio honorum; non cura deliciarum, & comparatio divitiarum, sed studium virtutum; cultus DEI, & amor pietatis.

14. Quocirca audi Dilectissime in Christo Frater Professande audi qualem te gerere debeas emissa sacra Professione, ut verè sis *quasi oliva fructifera in domo DEI*; in Claustro Religionis posita, & plantata. Nullô modô tuæ obliviscaris vocationis, quinimô tantam tui status dignitatem mente semper revolve, & vitam verè Religioso dignâ, ducere viribus totis satage, omnisquè cultor persistas virtutis: & fructum attulisti, quô in perpetuas veneris æternitates. Quod, ut eveniat, cordicitus precor.

Modò autem quæro ex te &c.  
vid. fol. 5. EX-

## EXHORTATIO XX. ad unum.

*Cantabo Domino, qui bona tribuit  
mihi. Psal. 12. 6.*

1. **Q**uicumque sacram intrant Reli-  
gionem, eò magis, dum con-  
stantem servantēs suæ vocationis spi-  
ritum, per gratiam & singularem  
DEI clementiam ad sacram acce-  
dunt Professionem, sollicitè confide-  
rare debent, quæ, & quanta illis DEI  
misericordia contulit, confert, &  
conferre adhuc non desinet bene-  
ficia.

2. Quis sufficienter trutinare  
poterit non modò æstimare illud be-  
neficio; illam gratiam, quâ nos à  
sæculi ereptos vanitate ad sacram  
vocavit Religionem dando nobis  
spiritualia auxilia, ut à peccatis sur-

gamus; ut mentis cæcitatem falsis  
mundi affixam delicijs, deponamus;  
ut bonam vitam incipiamus, & in ea  
perseveremus.

3. Revera magnus thesaurus  
misericordiæ DEI, in manu hæret  
Religiosi, quô repente dives bono-  
rum sensuum efficitur, dum quid-  
quid insolens mundana juvenus de-  
siderat, hoc totum, ut vana, ridi-  
cula, & suæ æternæ saluti nociva,  
damnat, & contemnit.

4. O quantis, & quam conti-  
nuis præsijs anima Religiosa robo-  
ratur, cum non post multos dies  
habitu religioso assumpto sibi ipsi  
dissimilis, & tota mutata inveniat!  
Delicatus adolescens inter delicias,  
& voluptates enutritus, qui lautè;  
& opipare rescebat; pretiosis in-  
duebatur vestibus, jam cibis insul-  
sis,

sis, malè præparatis nutritur, imò ipsa aliquando fame, & inedia reficitur; & vilissimò sacco induitur, aut asperimò ciliciò tegitur, nequè tamen frontem contrahit, sed lætus, & hilaris incedit.

5. En! qui ante carni addictus fuerat, jam carnem flagris, vigilijs, cilicijs, ac ciborum paritate domat. Qui ante ambitiosus incedebat; honoris, ac dignitatum cupidus fuerat, jam pedibus conculcari appetit; ignominiam amplectitur, & vilia obsequia; abjecta servitia, & humiles non refugit functiones. Qui totus ante in fervore, ac furia erat, jam factus Religiosus, totus velut agrus mansuetus, non provocatur injurijs; non irritatur contumelijs; nec convitijs conturbatur, ac læditur.

6. Et

6. Et hæc sunt quidem externa DEI beneficia animæ Religiosæ clementer indulta, ast quid dicendum de internis, quomodò per ea totus illius immutatur animus; quam dissimiles cogitationes; quam disparia desideria; quam p̄ie voluntates occupant cor ejus? Non cogitat quomodò ditescet, aut quomodò fætidum suum corpus ornabit; voluptatibus, & delicijs explebit, sed potius qua ratione commissâ peccata dignâ p̄nitentiâ puniet; pravos affectus coercebit, & seipsum, suamquè abnegabit voluntatem. Non desiderat honores; dignitates; præeminentias, sed sui potiùs contemptum, & vilipensionem. Non curat corporis commoditatem; non prætendit vanas rerum temporalium occupationes, sed in exercitio virtutum; in  
 affi-



assidua sacrorum librorum lectione; in pijsissima rerum cælestium contemplatione; in æternæ gloriæ assecutione consumit dies, & noctes. Non timet paupertatem; quia pauperes Christus beatos appellat. Non fugit laborem; quia nemo athleta sine sudore coronatur. Non horret supra nudam humum exusta jejunijs membra collidere; quia bene considerat, quòd Dominus jaceat cum illo.

7. Hæc omnia quid sunt, nisi gratiæ DEI fructus; divinorum auxiliorum, ac beneficiorum effectus; cælestium gratiarum compendia, quibus quasi germen agri anima Religiosa impletur.

8. Meritò Religiosus tantis divinis cumulatur beneficijs; tantâ nobilitatur gratiâ; tantis è cælo demissis roboratur præsidijs, quia hæc  
omnia

omnia postulat status ejus, quem  
DEI amore, arripuit, succensus.

9. Si enim Davidi attribuit ro-  
bur, ut superbum prosterneret Philis-  
tæum; si Ieremiæ dedit audaciam, ut  
Iudææ Reges, Principes, & Sacer-  
dotes argueret; si viduæ Iudith ma-  
gnum contulit splendorem, ut Ho-  
lophernem inescaret, quidni Reli-  
giosis ad statum perfectionis vocatis  
ea præsidia, ea beneficia, quæ præ-  
dixi, tribuet, sinè quibus statui su-  
scepto minimè satisfacere possent?

10. Illorum enim est magna o-  
bligatio, ut sint contemptores sæcu-  
li; vanæ gloriæ postpositores; virtu-  
tum cultores. Illorum est obligatio,  
ut orationi insistant; animi purita-  
tem inquirent; perfectionem secten-  
tur.

II. Vide jam nunc Dilectissime

in Christo Frater Prof. ssande, quomodò te capacem tantorum DEI beneficiorum reddere debeas per sacram Professionem. Non est hoc quidem opus virium tuarum, nequè fortitudinis naturalis; si enim sinè gratia DEI non possumus sanctas cogitationes, aut desideria concipere, quantò magis sæculum vincere; passiones suppressere; diaboli astutiam fugere, & devitare. Geme igitur in conspectu DEI tui; plora; instanter, pete divina beneficia, & auxilia donec pervenias illò, ubi securus consistes æviterne.

Modò autem quæro ex te &c.  
vid. fol. 5.



EX-

## EXHORTATIO XXI. ad plures.

*Vita vestra est abscondita in DEO.*

Coloss. 3. 3.

1. **H**ic est sermo, quem Spiritus S. per os sui famuli Doctoris Gentium D. Pauli omnibus Religiosis loquitur; ejus impulsu sacram ingressi sumus Religionem, quod vita nostra abscondita sit in DEO; hoc est, quod vita nostra spiritualis qualis sit, & quanta esse debeat, ut gratiam, & justitiam quis assequatur, ut DEO creatori suo perfecte obediat; ut virtutum meritis hanc vitam suam spiritualem custodiat, difficile sit intelligere.

2. Natura ergo hujus vitæ spiritualis prius est explicanda, ut qualem nos vitam in Religionis poma-rio plantatos ducere oporteat, &

Hic qua-

qualibus occupationibus intenti esse debeamus, primò pro posse investigemus.

3. Atque adeò vita nostra Religiosa, si eam brevi discretionem velimus explicare, nihil aliud est, quàm bonorum operum exercitatio, quâ DEO, propter DEUM famulamur; in virtute, ac sanctitate proficimus, & illam æternam vitam promeremur, cujus gratiâ conditi sumus.

4. Nequè verò hæc vita, est unum, aut alterum virtutis opus, sed series quædam bonorum operum; perpetua continuatio meritorum, ac diligens exercitatio virtutum, ut Religiosus de virtute in virtutem transiens, tamquam de claritate pro- vectus in claritatem, spirituali Domino mereatur præsentia ditari.

5. Scri-



5. Scriptum est enim, quia vita Religiosi omnibus virtutibus pol-  
lere debet. Quotidie enim tentatur,  
& impugnatur, nunc molliter, nunc  
acriter, semper tamen periculosè,  
& nequiter diabolo nobis insidi-  
ante.

6. Nullus proin otio torpeat,  
sed se in omnibus pro viribus exer-  
ceat virtutibus, accingatquè se tam-  
quam novus miles ense novo, hoc  
est, fervore spiritûs strenuè contra  
nequitias diaboli, & omnia vitia pu-  
gnaturus, atquè pugnet fortiter an-  
cipiti gladio, DEI scilicet timore,  
& suâ patientiâ, nè ulla ei virtus per  
omnia in via, & vita perfectionis  
succumbat

7. Sit illi semper præ oculis  
passio Christi; Martyrum certamen,  
incendium ignis æterni, lachrymæ

damnatorum, ac recolligat se frequenter per devotionem piam; lectionem sacram; cordis compunctionem, refrenetquè verborum levitatem arctò silentiò, & conservet internæ pacis tranquillitatem per oblivionem mundanorum.

8. Hæc spectant ad viros Religiosos; ad strenuos Christi milites, qui his armis virtutum, totâ suâ vitâ pro fide, DEI honore, lege æterna, ac suæ animæ salute, pugnant, & pugnare debent.

9. Eatenus caveat, nè ad dexteram, vel sinistram declinet, sed prævia semper luce, virtutum disciplinæ, & mandatorum divinatorum integritatis semitam teneat rectam.

10. Ista planè sunt spiritualis vitæ itinera peroptima cælitus viatoribus demonstrata, quatenus, quâ pergant

gant sufficienter edocti, in tenebras falsitatis minimè labantur.

II. Et quemadmodum non est miles, qui semel ensem, aut gladium exemit; non est Advocatus, qui rem aliquando defendit in judicio, nequè mercator, qui vitæ sustentandæ gratiâ, cibum, aut vestem mercatus est, sed miles est, qui militiæ disciplinam arripuit; Advocatus est, qui ex officio munus patrociniandi suscepit; mercator, qui omnes suas expensas eò dirigit, & exponit, ut opes, & divitias conquirat: ita non est spiritualis vitæ consecrator, qui aliqua bona opera tantum perficit, sed, qui propositô sibi DEO, tamquam ultimo vitæ suæ fine, universas actiones suas, in profectum spiritûs, & in sanctitatem, ordinat, & reducit.

12. Certè haudquaquam putet se esse virum spiritualem, qui statutis horis in Choro oscitanter psallit, aut permodicum tempus quotidie divina mysteria tepida mente considerat, cum tamen levia peccata non timeat; suos immoderatos affectus non ordinet; passionem non mortificet; virtutes, & animi puritatem non quærat, sed in vanis studiis, aut sæcularibus negotiis, aut in supervacuis colloquiis tempus, & vitam impendit.

13. Hæc est verè vita spiritualis, quæ defectus quosquæ etiam modicos detestatur, & non tantum in maximis, verum etiam in minimis, DEI amplectitur voluntatem; quæ mundum, & omnia sæcularia fugit; in vitam cælestem contendit; dæmoni, ejusquæ svasionibus indicit bellum,

lum, & DEI imperatis, ac divinis inspirationibus paret.

14. Vita verè spiritalis est, quæ omnibus curis, & cupiditatibus sæculi vacua, peccata deflet; passionum cohibet motus; amorem pellit creaturarum; tentationes vincit; Angelos imitatur; humilitatem amat; mansuetudinem conservat; non in plateis, sed in cella; non in foro, sed in cordis proprii domicilio commoratur; non cum hominibus, vel cum fratribus otiosis miscet sermones, sed cum sacris loquitur voluminibus; non rumores audit, sed DEI diligenter auscultat instinctus; omnibus peccatis moritur, & vitijs, ast singulis virtutibus vivit.

15. Eapropter Dilectissimi in Christo Fratres Professandi! si placet vobis vita spiritalis, ad quam



vos resolvitis per sacram Professi-  
onem, talis, qualem vobis hactenus  
exposui, seriò attendere debebitis,  
ut verè possitis dici, & esse Religi-  
osi. Si enim illam non solis deside-  
rijs, sed operibus præstabitis, tunc  
jam verè spirituales eritis viri toti  
curiæ cælesti gratissimi æviterne.  
Quod, ut suum sortiatur effectum,  
candido pectore exopto.

Modò autem quæro ex vobis  
semel, bis, & ter canonicè, utrum  
ex animo devoto, & spe perseveran-  
tiæ, optataquè salutis affectu, peta-  
tis ipsam Professionem?

FINIS.



IN

# I N D E X

Rerum Præcipuarū, quæ  
in hoc opusculo con-  
tinentur.

Litera F. denotat Foliū;  
Litera N. Numerum.

## A.

Ab ingressu ad Religionem perfectos  
oportet esse Religiosos. f. 31.  
n. 1.

Abnegatio propriæ voluntatis in quâ  
consistit! f. 39. n. 4.

## B.

Bajulatio crucis quid!- f. 40. n. 6.

Beneficia Religiosis cælitus data. f.  
106. n. 2. & sequ.

## C.

## C.

Charitas. f. 55. n. 3. & sequ. qui re-  
tinenda. f. 58. n. 8.

## D.

DEUS opulentissimus. f. 49. n. 1.  
& 2. liberalis. f. 51. n. 3. & sequ.  
quos ad se invitat, vere invitat.  
f. 64. n. 2 & sequ.

Doctrina Christi. f. 38. n. 2. & 3.

## F.

Finis Religionem petentium. f. 11.  
n. 1.

## I.

Imitatio Christi. f. 68. n. 1 & sequ.  
Ioachin Rex. f. 7. n. 2. f. 9. n. 4. &  
sequ.

## M.

Magistri juventutis renovandæ. f. 43.  
n. 2. & sequ.

Mundus vanus. f. 2. n. 2. f. 17. n. 7.  
& 8

re- p. & 8. malis refertus. f. 19. n. 1.  
& sequ. huic quomodo mori-  
tur? f. 17. n. 6. hujus descriptio.  
f. 60. n. 2. & sequ.

P.

I. qu. at. Paupertas felix. f. 26. n. 3.

Perfectio à quo propendet. f. 14. n.

1. non simplex. f. 31. n. 2. &  
sequ. ad illam invitantur o-  
mnes. f. 33. n. 7. omnibus possi-  
bilis; f. eodem. n. 8. maxime

II. Religiosis. f. 34. n. 9. & sequ.

ornamentum animæ. f. 54. n. 1.

ubi quærenda. f. eodem. n. 2. &

qu. & 3. aquirenda per charitatem. f.

57. n. 7. sectanda. f. 66. n. 6. &

seq. est thesaurus. f. 78. n. 12.

& 13. est difficilis. f. 81. n. 3. &

43. 4. Cur? f. 83. n. 6. & 7.

7. Perseverantia in bono. f. 12. n. 2. f.

73. n. 1. & seq.

Pro-

Profectus in bono f. 92. n. 1. & sequ.  
f. 98. n. 1. & sequ. hōc tenen-  
tur Professi prae Novitiis. f. 95.  
n. 6. & seq.

Professio prodromum agit ad vitam  
similem Angelicæ. f. 9. n. 5.  
& 6.

R.

Religiosi in perfectione proficere de-  
bent. f. 6. n. 1. cur educti de  
mundo! f. 22. n. 7. & 8. horum,  
qui DEUM pro DEO habent!  
f. 23. n. 9. 11. horum, quos verè  
sibi assumit DEUS! f. eodem.  
n. 10. stimulantur ad perfecti-  
onem. f. 7. n. 2. & sequ. f. 12.  
n. 2. & sequ. f. 33. n. 6. & sequ.  
f. 36. n. 14. f. 91. n. 10. f. 105. n.  
14. imitari debent Christum.  
f. 41. n. 7. præparent animas ad  
tentationem f. eodem. n. 7. &  
8. hos DEUS desiderat sibi si-  
miles



miles. f. 47. n. 10. f. 84. n. 8.  
& sebu. horum dignitas. f. 87.  
n. 2. & sequ.

S.

Salus à quo propendet. f. 14. n. 1. il-  
lius spes certa. f. 25. n. 1. & 2.

Sponsa Christi Religiosi Professi. f.  
87. n. 2. & sequ.

Status Religiosus felix. f. 26. n. 4.  
qualis? f. 37. n. 1. in hoc non  
promittantur sibi honores &c.  
f. 38. n. 2.

V.

Vita gloriosa, sancta, & beata quæ?  
f. 14. n. 1. qui obtinetur? f. 15.  
n. eodem. & sequ. spiritualis  
quid? f. 114. n. 3. & 4. quomo-  
do hæc sectanda? f. 115. n. 6.  
& sequ.

Vocatio non à quo? f. 27. n. 5. & 6.  
à quo? f. 29. n. 7. 8. & 9.

Voluntas propria lepra f. 40. n. 5.





Handwritten text at the top of the page, possibly a title or header.

Handwritten text in the middle section of the page.

Handwritten text in the lower middle section of the page.

Handwritten text at the bottom of the page, possibly a signature or footer.





Biblioteka Jagiellońska



stdr0027953



